

# *GE MAHLO A BONA A BULEGILE, BA MO TSEBILE*

 Tate wa rena wa Legodimong, re a rapela bjale gore O tla amogela letago go tšwa kgobokanong ya rena mmogo. Re a Go leboga bakeng sa sebakabotse. Šegofatša Lentšu la Gago ge Le eya pele bošego bjo bongwe le bjo bongwe. Šegofatša batho ba Gago ge ba Le kwa. Gomme a nke Moya wo Mokgethwa wo mogolo o sware Lentšu le le welago ka pelong, le go Le dira le iponagatše Lonamong, gore ka nnete makgolo a batho, go kgabola naga mo, ba ke ba phološwe. Makgolo a bona ba ba tlaišegago, ba robetše ka meriting ya lehu, a nke ba bone Seetša se segolo se tabogela godimo, gomme a nke ba fodišwe, gomme Leina la Gago le legolo le hlomphiwe. Ke ka baka leo re lego mo, Morena, ga se bakeng sa tlhompho go renabeng, eupša go hlompha Jesu Kriste magareng ga rena. Ka gore re e kgopela Leineng la Gagwe. Amene.

<sup>2</sup> Bjale ge le tsena ka Beibeleng ya lena, feela dinakwana di se kae. Gomme bošegong bjo bongwe le bjo bongwe bjale ke tla no bolela e ka ba metsotso ye masomepedi go ya go masometharo. Ke bile lebaka la dibeke di se kae tša go feta. Gomme go no bolela metsotso e se mekae, gomme morago re tla bitša mothalo wa thapelo, go rapelela balwetsi, goba e ka ba eng Moya wo Mokgethwa o e hlahlago.

<sup>3</sup> Gomme ke ba bakae ba tla, le batli ba mathomo bošegong bjo, gomme lena bohole mmogo, le tla rapediša kopano, a le tla dira seo? Ga re fa feela...re—re fa gobane re leka go thuša. Baena, ke a dumela, Morena a re thuša, re tla ba le kopano ye kgolo go hlompha Morena le Mopholoshi wa rena.

<sup>4</sup> Re a dumela O etla, tsela ya maleba. Ge A se mo bošegong bjo, ke tla be ke Mo lebeletše mosong. Ge A se mo gosasa bošego, ke tla ba mo, Morena ge a rata. Gomme ka gona ge A se mo, ke tla Mo lebelela gosasa bošego. Gomme ka gona ge A se mo, ke tla Mo lebelela bošego bjo bo latelago. Ke a nyaka. Ke be ke Mo lebeletše lebaka la mengwaga ye masometharo tharo bjale, karolo ye kgolo ya bophelo bja ka, gomme ga se ka nolega moko. Ke šeditše, letšatši ka letšatši, le iri ka iri, bakeng sa Gagwe go bonagala.

<sup>5</sup> Bjale ge re phetla ka Beibeleng, ka go Puku ya—ya Mokgethwa Luka, tema ya 24, go thoma ka temana ya 13. A re emeng, ka go hlompha Lentšu, ge re bala. Mokgethwa Luka 24, go thoma ka temana ya 13. Bjale ge ba bangwe ba lena le na le Dibeibele tša lena, ba bangwe ba bona ba rata go boloka

hlogotaba ya modiredi, fao a bolelago go tšwa gona. Gomme bjale ke nyaka le theetše sekgauswi. Balang le nna ge le ka kgora, go lenabeng, ge re sa bala.

*Gomme, bonang, ba babedi ba bona ba ile lona letšatši la go swana motseng wo o bitšwago Emause, e bego e ka ba botelele bja mašemo a masome a a tshelelago go tloga Jerusalema.*

*Gomme ba sepetše mmogo... dilo tšohle tša tše di diregilego. (Ke kgopela tshwarelo ya lena.) Gomme ba boletše mmogo ka dilo tšohle tše tše di diregilego.*

*Gomme go diregile, gore, ge ba be ba sa boledišana mmogo le go fa mabaka, Jesu yenamong o batametše kgauswi, gomme a sepela le bona.*

*Eupša mahlo a bona a be a širilwe gore ba se kgone go mo tseba.*

*Gomme o rile go bona, Ke dipoledišano tša mohuta mang tše le nago natšo seng sa lena, ge le sepela, gomme le nyamile?*

*Gomme yo motee wa bona, yo leina la gagwe e bego e le Kleopa, a araba, a re go yena, A o moeng o nnoši ka Jerusalema, gomme ga wa tseba dilo tše di tlago go phethega... ka matšatšing a?*

*Gomme a re go bona, Ke dilo dife? Gomme ba rile go yena, Malebana le Jesu wa Nasaretha, yo e bego e le moprofeta yo maatla medirong le lentšung pele ga Modimo le batho bohle:*

*...bjale baprista ba bagolo le bona babuši ba mo gafetše go ahlolelwa lehu, gomme ba mmapotše.*

*Eupša re be re tshepile gore o be a le yena a bego a swanetše go lopolla Israele: gomme ka ntile ga sohle se, lehono ke letšatši la boraro ge e sa le dilo tše di dirwa.*

*Ya, gomme basadi ba bangwe ba rena le bona ba re makaditše, bao ba bego ba le lebitleng ka leselaphutiana;*

*Gomme ge ba hlokile mmele wa gagwe, ba ttile, ba bolela, gore le bona ba bone pono ya barongwa, ye e boletšego gore o be a phela.*

*Gomme ba bangwe ba bona ba ba bego ba na le rena ba ile lebitleng, gomme ba e hweditše ebile bjalo ka ge basadi ba boletše: eupša yena ga se ba mmona. Morago o rile...*

*Ka gona a re go bona, O mašilo, le ba pelo ya go tšwafa go dumela tšohle tše baprofeta ba di boletšego:*

*A Kriste o be a se a swanela go tlaišega ka dilo tše, le go tsena ka letagong la gagwe?*

*Gomme a thoma ka Moshe le baprofeta bohole, a ba hlathollela... mangwalo ohle dilo tše di amago yenamong.*

*Gomme ba batamela kgauswi ka motseng, moo ba bego ba eya: gomme a dira mo o ka rego o be a sa ya pejana.*

*Eupša ba mo phegelela, ba re, Dula le renā: ka gore ke go batamela mantšiboa, gomme letšatši le fedile. Gomme o ile ka gare go leta le bona.*

*Gomme gwa tla go phethega, ge a dutše dijong le bona, o tšere borotho, gomme a bo šegofatša, le go bo ngwatha, gomme a ba fa.*

*Gomme mahlo a bona a bulega, gomme ba mo tseba; gomme a timelela pele ga mahlo a bona.*

*Gomme ba boletše seng sa bona, A dipelo tša renā ga tša swa ka gare ga renā, ge a be a bolela le renā tseleng, le ge a butše lengwalo go renā?*

*Gomme ba tsogile gomme ba ile iri ya go swana, le go boela Jerusalema, gomme ba hwetša ba lesometee ba kgobokane mmogo, le bona bao ba bego ba na le bona,*

*Ba re, Morena o tsogile ka nnete, gomme o bonagetše go Simone.*

*Gomme ba boletše dilo tše di dirilwego ka tseleng, le ka fao a go tsebja go bona ka go ngwatha borotho.*

<sup>6</sup> A re inamišeng dihlogo tša renā. Morena Jesu, re a rapela gore O tla itira Wenamong go tsebja go renā ka mokgwa wa go swana, bošegong bjo, ge re Go letetše. Leineng la Jesu re a rapela. Amene.

Le ka dula.

<sup>7</sup> Bakeng sa thuto go tšwa go yeo, ke tla rata go tšeа mantšu a: *Ge Mahlo A Bona A Bulegile, Ba Mo Tsebile.*

<sup>8</sup> Bjale re a bolela, ka nnete, ka tsogo, ye e dumetšwego magareng ga badumedi bohole ba Bakriste lehono. Ke kholofelo ya Kereke. Ge Kriste a se a tsoga, gona re lahlegile. Gomme Bokriste bo theilwe godimo ga tsogo, bjale, e sego peolegatong. Tsogo! Mohlala, sekgonyo se sa mothele fa, ge nka lahlela seo lebatong, gomme ka re, “Gabotse, ke se lahletše, ke tla bea se sengwe sa go swana le sona mo,” yeo ga se tsogo; yeo ke peolegatong. Le a bona? Tsogo ke “go tlisa selo sa go swana seo se ilego tlase.” Gomme Modimo o Mo tsošitše ka letšatši la boraro. Gomme re dumela seo ka pelo ya renā yohle, gomme re dumela kanegelo ya Beibebe.

<sup>9</sup> Gomme elang hloko, ka mosong wo wa mathomo wa Paseka, Jesu o a phela magareng ga bona, go tšwa magareng ga bahu.

<sup>10</sup> A selo se sebotse! Ke thabile bjang bošegong bjo go feleletša seo ka “amene,” gore ke a dumela O sa phela magareng ga renā,

ka nako ya seruthwana ya Ebangedi ya letago ya Kriste. Ke a dumela O sa phela.

<sup>11</sup> Ke a dumela gore yeo e bile... Ya. Yeo e bile nako ya seruthwana ya tsogo, le yona, ya bophelo, bja motho. Motho ka mehla o boofile lehu; ba be ba se ne netefatšo ya go tsoge ba tla morago gape morago ga go hwa.

<sup>12</sup> Eupsa go Mmona a ehwa kua Khalibari, morago a tsošwa gape gomme o be a na le bona, a sepela magareng ga bona ka letšatši le la letago. Ka morago ga mahloko a pelo le manyami, le go ya pele, ao ba ilego go a kgabola, gomme tšona diiri tše leswiswi tša go Mmona a bapolwa le go tshwelwa, le go dirwa metlae, le tšohle A ilego go di kgabola ka go mengwaga yela ye meraro le seripa, le tšona diiri tša go tswalela tša leswiswi tše di Mo dirilego... Bafarisei bale, ba Mo hloile, go le bjalo, gomme ba be ba hlalala gobane ba naganne ba e feditše, gomme šo O a tšwelela magareng ga bona! Nna, a letšatši! Ke tla...

<sup>13</sup> A o ka se rate go tšea leeto le Kleopa le bona, tseleng go ya Emause? Nka be ke ratile go be ke sepetše le bona. Gomme go a kgonega. Ke thabile go ba ke phela lehono, gore ke sa kgona go dira selo sa go swana, go sepela le Yena lehono feela go swana le ge ba dirile nako yela.

<sup>14</sup> Kgopolu ya yona, e bile, gore Jesu o tsogile go tšwa bahung bjang. Eupsa karolo ya go nyamiša ya yona, e bile, ba bangwe ba bona bao ba Mo ratilego, ba be ba sa e tsebe.

<sup>15</sup> Gomme seo ka nnete ke seswantšho sa lehono. Go na le batho ba bantsi ba ba Mo ratago, ba ba sego ba be ba lemoga gore O a phela. Bona, ke mohuta tsoko wa histori yeo ba ithutilego ka go sekolo tsoko. Ke puku tsoko ya thutamodimo, maitshwaro tsoko, mokgwa wa maitshwaro, ao ba ithutilego felotsoko, gomme Jesu ke seswantšho sa histori go bona. Gomme efela, ka go histori, ba a Mo rata, gomme ga ba lemoge gore O phela le rena, o sepela thwi go dikologa le rena, feela bjalo ka ge ka mehla A dirile. O fa feela go swana bjalo ka ge—bjalo ka ge A kile a ba.

<sup>16</sup> Bjale, bona, lebaka (bona) gobaneng ba se ba e dumela, ke ka gobane tsogo e be e le ya go se tlwaelege kudu. Le a bona, go be go le... Seo se be se se sa direga pele, kafao e be e le selo sa go se tlwaelege go bona go dumela se sengwe boka seo.

<sup>17</sup> Gomme go se tlwaelege ke moo Modimo a robetšego. Le a bona? Tswalo ya Kriste e be e se ya tlwaelega, "kgarebe e tla ima." Modimo ka mehla ga a tlwaelege. O dira selo sa go se tlwaelege, eupša ka mehla ke go ya ka Lentšu la Gagwe. Ga A ke a dira selo ka ntle ga Lentšu la Gagwe, ka mokgwa wa go se tlwaelege; gobane, O e tshepiša pele, gomme morago o romela yo mongwe go bonagatša Lentšu lela, go Le dira kgonthe go batho.

<sup>18</sup> Ge lena batho ba Pentecostal pele le amogela kolobetšo ya Moya wo Mokgethwa, seo e be e le selo sa go se tlwaelege. Eupsa go le bjalo Modimo o O tshepišitše, "go O tšholla ka matšatšing

a mafelelo,” gomme O be o le mo. Kafao ga go kgathale e be e le selo sa go se tlwaelege bjang, e be e le tshepišo ya Modimo ye e bego e swanetše go dirwa go bonagala, gobane Modimo o e tshepišitše.

<sup>19</sup> Bjale tsogo e be e se ya tlwaelega go ba bantsi ba Gagwe, batho ba ba Mo ratilego; efela e be e le Lentšu le le tshepišitšwego, eupša go se tlwaelega kudu go dumela.

<sup>20</sup> Phodišo Kgethwa lehono, ga—ga se e tlwaelega kudu go batho go fihla ba sa nyake go e dumela, gomme efela ke Lentšu le le tshepišitšwego.

<sup>21</sup> Selo se seo re se bonago se direga lehono ke tshepišo ya Modimo, eupša ga se ya tlwaelega go monagano wo o sego wa ke wa gopola ka yona ka tsela yeo.

<sup>22</sup> Gomme yeo ke tsela ye tsogo e bilego go batho ba bantsi ba ba Mo ratilego. Go be go le batho ba ba Mo hlomphilego le go Mo dumela go ba moprofeta wa Modimo, le go Mo dumela go ba Morwa wa Modimo, le go ya pele, eupša go le bjalo (bona, bona) tso—tso tsogo e be e le ye ntši kudu go bona go dumela. E be e le tiragalomatlabi kudu.

<sup>23</sup> Gomme o tsea e ka ba eng yeo ka kgonthe e lego ntle ka go tiragalomatlabi ka mokgwa woo, ka mehla e hlahlufe ka Lentšu. Gomme ge Lentšu le e tshepišitše, gona ke Modimo feela a tsogago go lefelotiragalogo gape. Gomme yeo ke tsela ye tshepišo ye nngwe le ye nngwe e lego.

<sup>24</sup> Gomme yeo ke tsela ye ba swanetšego go be ba e bone nako yela, gobane Modimo o tshepišitše O be a tla Mo tsoša letšatšing la boraro. Dafida o rile, “Nka se tlogole soulo ya Gagwe ka heleng, ebile Nka se tlogole Yena Mokgethwa wa Ka go bona go bola.” Jesu o rile, “Senyang mmele wo gomme Ke tla o tsoša gape mo matšatšing a mararo.” Le a bona, e be e le tshepišo.

<sup>25</sup> Gomme e be e le tiragalomatlabi, e se ya tlwaelega kudu, gomme ba bantsi ba ba bego ba Mo rata ba be ba sa kgone go e kwesiša. Gobane, e be e—e be e thekesela, go lefase ka moka, bakeng sa Monna yo a bapotšwego, gomme tšoša e kitima go kgabola pelo ya Gagwe, goba lerumo, lerothi le lengwe le le lengwe la madi ka mmeleng wa Gagwe le be le feleletše ntle godimo ga sefapano, gomme ba Mo tšere le go Mo tswalelela ka lebitleng, le go tokolosa leswika godimo ga lona, go tšere lekgolo la monna go e dira, gomme ka morago ba le tswalela ka lehuto la Roma, gomme ka gona go re, “Morongwa o tlie fase le go kgaola lehuto, le go pshikološetša letlapa kgole, gomme šo O a phela magareng ga rena.” E be e le mohuta wa selo sa go tlaba.

<sup>26</sup> Gomme lehono ke mohuta wa go swana wa tiragalomatlabi. Ge batho ba nagana O hwile, seo se e rarolotše, mengwaga ye makgolo a lesomesenyane ya go feta; gomme šo Yena lehono, ka morago ga mengwaga ye makgolo a lesomesenyane, o sa le magareng ga rena, feela bontši ka fao A bilego nako yela, feela

kgonthe boka A bile nakong yela, a dira dilo tša go swana A di dirilego nako yela. Ke bontši kudu bja tiragalomatlabi. Batho ga ba kgone go e kwešiša. E ya ka godimo ga go fa mabaka ga bona. Nnete, ke mang a ka kgonago go fa Modimo mabaka? Ga go yo motee a ka kgonago go fa Modimo mabaka.

<sup>27</sup> Ga go yo motee a ka kgonago go hlatholla Modimo. Modimo ke mohlatholli wa Gagwe Mong. Modimo o bolela Lentšu; gomme ba re, "Gabotse, o na le tlhathollo ya go fošagala." Modimo o e dira e phethagale, yeo ke tlhathollo. Ga e hloke e ka ba mang go Mo hlatholla. Ke sa tšo bolela ka seo, toropokgolo tlase fa. Modimo o rile, "A go be le seetša," gomme go bile le seetša. Ga e hloke tlhathollo ye e itšego; go bile seetša. Modimo o rile, "Kgarebe e tla ima," o dirile. Seo se a e rarolla. Kafao ge A bolela e ka ba eng, gomme gona Yena—Yena ke mohlatholli wa Gagwe Mong. Ga A hloke tlhathollo ya rena ya yona. Beibele e boletše gore, "Lengwalo ga se la tlhathollo ya sephiri." Ke Modimo ka Boyena a dirago tlhathollo ya Lona. Hlokamelang, ba bantši ga se ba e bona gobane ga se ba puruputša Mangwalo. Ga se ba theetša se A se boletše go.

<sup>28</sup> Ba bantši, lehono, ga se ba theetša Molaetša, ga se ba theetša Lengwalo le se Kriste a se tshepišitšego ka matšatšing a a mafelelo. Ke ka baka leo batho ba lego ka leemong le ba lego lehono, gomme dikereke tšohle di kgomagantšwe magareng ga tšona seng. Ga se ba lemoga se Lengwalo le se boletše bakeng sa letšatši le. Ga se ba ke ba ela hloko dilo tše di be di swanetše go dirwa. E no ba phethagatšo ya Lengwalo. Batho ba bantši ba a Mo rata. Batho ba bantši ba dumela ka go Yena. Eupša efela ke tiragalomatlabi kudu, ga ba kgone go Le kwešiša, ge o bolela ka Yena, go no swana le ge A be a le maabane, a dira dilo tša go swana. Ba tteleima gore ba dumela seo, eupša, ge e direga, gona ga ba e kwešiše. Bona, ba no se kgone go e dumela.

<sup>29</sup> Elang hloko, ba be ba bolela ka Yena ge A tšwelela. Bjale, seo ke selo se sebotse. Re lemoga fa ka Lengwalong, Le rile, "Gomme ge ba sa bolela ka Yena, ge ba sa bolela ka dilo tše, di eya mmogo, ba bolela ka Yena, ba nyamile," ge ba hwetša gore O tšweletše. Gomme ge A tšweletše, O tšweletše go bona ge ba be ba eya mmogo, ba sa fa mabaka ka Yena. Moo ke ge ka mehla A tšwelela, ke ge re bolela ka Yena. Ka mehla, go kgabola Lengwalo, ke ge batho ba bolela ka Modimo, ke ge A bonagetše.

<sup>30</sup> Bjale re matasatasa kudu re bolela ka dilo tše dingwe. Ke nagana ke ka lebaka leo batho ba bantši, ba ba Mo ratago, ba šitwago go Mmona. Re matasatasa kudu le dithutotumelo tša rena le dikerekemaina, le kgwebo ka dikereke, le boleloko, le go hwetša maloko a mantši le dilo, re matasatasa kudu go bolela ka Yena. Yena ke Lentšu. Re ne kgahlego kudu ka go se... thutotumelo tsoko, pukungwalwa tsoko, goba se sengwe gape se se bolelago. "Ke maloko a makae re ka kgonago go a tsenya ka gare, ra ba boutela ka gare? A re ka tšea yo motee yo, yo motee

*yola, yo mongwe yo motee?"* Re swanetše go be re ineela renabeng kgafetša go Lentšu la Modimo le thapelo, re ithuta Lentšu. Eupša re ne kgahlego kudu ka go se sengwe gape.

<sup>31</sup> Batho ba ba be ba nyamile. Ba be ba bolela; selo se segolo se diregile; O be a tla tšewa go tloga. Eupša ba be ba bolela ka Yena, gomme fale A tšwelela. Gomme ge A tšwelela, O be a le mosetsebje go bona. Ga se ba e kwešiša. Sa pele, O ut- . . . sa pele, re hwetša gore O be a sepela- . . .

<sup>32</sup> Ge ba be ba sepela tseleng go theoga go ya toropongkgolo ye nnyane, Emause, feela maele o se kae goba ye mebedi tlase kua, Leeto la letšatši la sabatha, goba se sengwe; sa pele, O utollotše Lengwalo la tshepišo la Yenamong, go bona, bakeng sa letšatši lela. Bjale elang hloko ge Jesu a etla go lefelotiragalo, ge re nyaka go Mmona le go bolela le Yena ka morago ga tsogo ya Gagwe, boka ba dirile, boka ba Mmone, selo sa pele A se dirilego go bona e bile go ikutolla Yenamong go bona, ka Lengwalo. Amene. Seo ke go e dira eng? Ba be ba le Bahebere. Ba dumetše Lentšu. Gomme ba . . . Yena, O ikutolotše ka Boyena, a utolla Lentšu le le ngwadilwego la Gagwemong, se A bego a swanetše go se dira bakeng sa lebaka leo. Amene. Yo mongwe le yo mongwe . . .

<sup>33</sup> Modimo, ka go Genesi, gomme ka gona pele ga motheo wa lefase, O e abetše, gomme O e boletše le go bolela se se tla diregago, go theoga go tloga mathomong—go thoma go fihla bofelong.

<sup>34</sup> Ka mehla dikereke di ba tše di hlakahlakanego, gomme di tšwela ntile, gomme motho o swanetše go lahlela se ba se dumelago ka Lona. Gomme yo mongwe *yo o re*, "Gabotse, ke dumela phapano ye nnyane go tšwa go seo," gomme o mo dira se sengwe. Gomme yo motee yo o swanetše go dira se sengwe. Yo mongwe le yo mongwe o na le tora, toropokgolo, goba se sengwe se ba swanetšego go se aga, ka mehla o leka go oketša se sengwe goba go dira se sengwe, le go bolela gore, "Re dirile *se*." Oo, yeo ke tsela ye o hlakahlakanago.

<sup>35</sup> Tšwela ka ntile ga seswantšho. A nke Modimo a e dire. Le a bona? Lentšu la Gagwe *še*le, se A rilego O tla se dira. Lebaka le lengwe le le lengwe, O romela moprofeta godimo kua, ka motlotšwa. Lentšu la Morena le tla go moprofeta, ka mehla, go Le hlatsela ka go lebaka.

<sup>36</sup> Johane Mokolobetši o tlile go lefelotiragalo. O be a le moprofeta wa nako yeo. O be a le Seetša sa lebaka, gobane moprofeta, Maleaki, o boletše ka yena a etla, "Ke tla roma motseta wa Ka pele ga sefahlego sa Ka." Jesaya, mengwaga ye makgološupa le lesomepedi pele ga fao, o rile, "Segalontšu sa yo a tla goevelago ka lešokeng, bonang Ke . . ." se a bego a tla se dira ka matšatšing a mafelelo, "dirang tsela go otlologa ka lešokeng," gomme dilo tšohle tše di profetilwe ka yena. Ge a etla go lefelotiragalo, o be a le moprofeta go bonagatša tshepišo yela.

<sup>37</sup> Jesu ke Lentšu, gomme Lentšu ka mehla le tla go moprofeta. Gomme elelwang, ge moprofeta yo a be a profeta, “a otlolla tsela,” gomme ka gona ge Lentšu le be le le lefaseng, Lentšu le sepeletše thwi ntle ka meetseng gomme la tla go moprofeta. Amene! E phethagatše bjang! Lentšu le tla go moprofeta. Gomme O be a le Lentšu. Ka gore, “Mathomong go be go le Lentšu, gomme Lentšu le be le le go Modimo. Gomme—gomme Lentšu la dirwa nama gomme la dula magareng ga rena, gomme ra Mmona.” Ga go makatše ge A rile, “Go re swanetše gore re phethagatše toko yohle.” Lentšu le tlie go moprofeta, ka meetseng, go phethagatša toko yohle.

<sup>38</sup> Gomme re hwetša nako yeo gore O ikutolotše Yenamong go Kleopa le mogwera wa gagwe fa. Ga e tsebje, ka leina, phathi ye nngwe. Eupša e be e le Kleopa, re a tseba, gomme O ikutolotše Yenamong go bona, ka Lengwalo. Elang hloko ka fao A—A boletšego.

<sup>39</sup> Elang hloko, ba, ba Mmiditše “Moprefeta.” “A ga o tsebe dilo tše? Jesu wa Nasaretha, Moprefeta yo Modimo a iponagaditšego ka Boyena go yena.” Le a bona? Yeo, pele ga batho bohle, le go ya pele, O be a bitšwa Moprefeta. Ka gona ge ba ile ba lemoga Yena yo ba bego ba bolela ka yena, ka go ba Moprefeta, go be go lebega o ka re ba be ba tla bona thwi mo Moprefeta yola wa go swana o topile Lentšu gape gomme a thoma go Le utolla.

<sup>40</sup> E lego, O be a le Lentšu, gomme o be a ikutolla ka Boyena, ka molomo, Lentšu le le bego le ngwadilwe ka Yena. Gomme O thomile, gomme O thomile go tloga go Moshe, le go ba hlalošetša tšohle tše baprofeta ba di boletšego ka Yena. Oo, nna! Ka fao A e dirilego go tsebja go lebaka lela! “Mašilo, pelo ya go tšwafa. Go tsebeng gore Moshe le baprofeta bohle ba boletše gore Kriste o swanetše go tlaišega le go tsena ka Letagong la Gagwe.” Le a bona, gomme go lebaka leo, seo ke se se bego se swanetše go direga. “A ga le tsebe O swanetše go dira seo?” Le a bona, go utolla Lentšu le le ngwadilwego la Gagwe.

<sup>41</sup> Yeo ke tsela ye Kriste ka mehla a e dirago. Modimo ga a tsoge a fetola lenaneo la Gagwe. Tsela ye A e dirago nako ya pele, yeo ke tsela ye A e dirago nako le nako. O dirile sephetho, ka serapeng sa Edene, ge motho a lahlegile, go mo pholosa ka Madi a tšholotšwego. Leo ke lefelo le nnoši A ka tsogego a kopana le motho. Leo ke lefelo le nnoši A kilego a kopana le motho, ge e sa le. Ke ka tlase ga Madi a tšholotšwego.

<sup>42</sup> Re lekile go ba ruta. Re agile ditoropokgolo. Re agile se sengwe le se sengwe gape, re leka go tliša batho mmogo. Re lekile go tsea thuto le go di kitimiša mmogo. Go leka go tsea maatla a sešole le go a kitimiša mmogo. Re lekile dikerekemaina, go di kitimiša mmogo. Tšohle di paletšwe.

<sup>43</sup> Modimo o na le lefelo le tee, leo le lego ka tlase ga Madi. Yeo ke tsela e nnoši. Ka tlase ga Madi, O tla kopana le motho. Gomme ke banešu ba go tswalwa ka Madi.

<sup>44</sup> Ke a holofela ga ke le bate ditsebe ntle kua, ka se, eupša e kwagala o ka re go na le mmalewaneng. Ge e le... A le kgona go nkwa gabotse? Ge le kgona, phagamišang diatla tša lena. Go lokile. Bjale, kafao feela gore ke tsebe gore le hwetša Se; le swanetše.

<sup>45</sup> Elang hloko bjale, ge A boletše, go le bjalo ba paletšwe ke go Mo tseba ka Lentšu le le ngwadilwego. Naganang ka seo! Ge A etla gomme a ikutolla ka Boyena ka Lentšu, go bona, gomme ba ile ba šitwa go e bona.

<sup>46</sup> Ge seo e se seswantšho sa lehono, ga ke tsebe ke eng. Ba sa šitwa, ge Lengwalo le bolela dilo tše. "Go tla tla go phethega ka matšatšing a mafelelo," go boletše Modimo, "Ke tla tšollella Moya wa Ka godimo ga nama yohle; barwa le barwedi ba lena ba tla profeta. Godimo ga balata ba Ka le bahlanka ba basadi Ke tla tšollella Moya wa Ka, ka letšatšing leo. Ke tla bontšha matete ka magodimong godimo, le mollo le muši, le go ya pele." Go le bjalo ga ba e bone.

<sup>47</sup> Jesu o rile, "Bjalo ka ge go bile ka matšatšing a Noage, go tla ba bjalo ka go tleng ga Morwa wa motho; ba tla be ba ejá, ba enwa, ba nyala, ba neela lenyalong. Bjalo ka ge go bile ka matšatšing a Loto, go tla ba bjalo ka go tleng ga Morwa wa motho." Dilo tšohle tše ba boletšego ka tšona, gomme Lentšu le rerwa go tšwa sefaleng, gomme go le bjalo ba bantši ba ba Mo ratago ga ba e bone. Ba sa phiphila ka leswiswing. Go le bjalo ba šitwa go Mo tseba, ka Lentšu le le ngwadilwego.

<sup>48</sup> Ba tšea diseminari, gomme ba fapoga gomme ba Le foša, le se sengwe le se sengwe, gomme ba e tliša morago, gomme ga ba tsebe ke eng ka lefaseng go—go dumela. Yo motee o re Le ka tsela *ye*, gomme yo motee o re Le ka tsela *yela*. Kafao feela Lentšu le le ngwadilwego, Jesu ga se a tsoge a ba botša go ya ka lefaseng lohle le go "ruta." O rile, "Eyang ka lefaseng lohle gomme le rere Ebangedi." Phapano ye ntši, go leka go ruta se sengwe, le go rera se sengwe. *Go rera* ke go "dira go bonagatšwa." Go swanetše go e dira, go bonagatša maatla a Moya wo Mokgethwa. "Maswao a a tla latel bona ba ba dumelago." Go tšea Moya wo Mokgethwa go bonagatša Lentšu leo. Ge e le Therešo, Lentšu, Modimo o tla e bonagatša. Ge e se Therešo, Modimo a ka se be le selo go dira le yona, gobane Modimo a ka se itatetše Yenamong ka maaka, le tseba seo, gobane Yena ke Modimo bjale, go swana bjale.

<sup>49</sup> Ba teleimile gore ba be ba dumetše, gomme ba be ba le barutiwa ba Gagwe, ba Mo ratile, ba e dumetše, gomme O be a eme thwi le bona, a lhatholla Lentšu, Yo A bego a le yena, gomme go le bjalo ga se ba ke ba e tseba. E no naganang ka seo! Ga se ba e tsebe, gomme Yena a eme kua ka Boyena, a

ngwadilwe ka Lengwalong, le go ya morago le go topa Lengwalo, le ngwadilwego lebaka la makgolo a mengwaga, mabapi le Yena, le go bolela ka fao A swanetšego go dira le dilo tšohle tše boka tše, le go sepela tikologong le go re, “Ga o bolele bjalo? Gabotse, o tseba eng!” Gomme Yena, Yena a dira polelo, gomme go le bjalo ga se ba e lemoga.

<sup>50</sup> A seswantšho sa letšatši le! Go a swana bjale, ba tleleima ba dumela gore O tsogile go tšwa bahung, eupša, ge A tšwelela go ipontšha Yenamong, go le bjalo ga ba e dumele. Le a bona? Go le bjalo, ba tleleima ba a E dumela. “Oo, ee, re a dumela O tsogile ka letšatši la boraro.” A nke A dire se sengwe go bontšha O tsogile ka letšatši la boraro; “Oo, ga ke dumele go seo.” Le a bona? Ke lena bao, selo sa go swana.

<sup>51</sup> Elang hloko, O rile, “Mašilo, le ba pelo ya go tšwafa go kwišiša tshepišo ya Lengwalo ya lebaka le.”

<sup>52</sup> Mašilo ba rile, “Oo, O ile. Ba Mmapotše, gomme re kwešišitše O tsogile gape, eupša, oo, nna, yeo e no ba kanegelo ya sephiri yeo yo mongwe a e boletšego. Re be re sa tsebe selo ka yona. Oo, ke a le botša, ke selo sa go nyamiša kudu!”

<sup>53</sup> O rile, “Lena mašilo, le ba pelo ya go tšwafa go kwešiša se Lengwalo le se boletšego sa lebaka le.” Amene.

<sup>54</sup> Ke lena bao. Ke duma nka kgona go thuthupiša yeo go Khansele ya Mohlakanelwa. Ee, mohlomphegi. Go nokologa ga pelo, go tseba Lengwalo le bolela dilo tše; go le bjalo ga le e kwešiše. Ke lena bao.

<sup>55</sup> O rile, “Mašilo, le ba pelo ya go tšwafa go kwešiša Lengwalo le le profetetšwego letšatši leo, gomme feela tlwa ka fao e tla diregago, gomme še e diregile. Kriste o tsene ka Letagong la Gagwe, ka go tlaišego pele, ka go hwa; gomme o hwile, o tsogile gape letšatšing la boraro. Ga se ba ke . . . Yeo ke tsela ye Lengwalo le rilego O be a swanetše go e dira, go tsoga ka letšatši la boraro.” O rile, “Le ke letšatši la boraro ge e sa le e direga.”

<sup>56</sup> O rile, “Gabotse, seo ke se ke lekago go le botša!” Gomme go le bjalo ga se ba e kwešiša. Ka gona O rile, “Le mašilo, le ba pelo tša go tšwafa go kwešiša tšohle tše baprofeta ba di boletšego, gomme Lengwalo le bolelwa ka letšatši le. Gomme mo e diregile thwi pele ga lena, gomme ga le e tsebe.”

<sup>57</sup> Ba rile, “Gabotse, o tseba eng!” Le a bona, mahlo a bona a be a foufetše.

O re, “A le ka ba sefofu mo letšatšing le?” Ee, mohlomphegi.

<sup>58</sup> Go foufetše letšatši le bjalo ka ge go bile nako yela. Nnete. A Beibele ga se ya re, “Ba tla ba hlogothata, monagano wa godimo, barati ba maipshino go feta barati ba Modimo; barobadikwano, baphari ba maaka, ba go se itshware, le banyatši ba bao ba lokilego; ba na le sebopego sa bomodimo, eupša ba tla gana Maatla a bjona, Maatla a tsogo le ponagatšo ya Morwa wa

Modimo”? Beibele e rile e tla direga, kafao e swanetše go direga. Feela bjalo ka ge a boletše, Jesaya o boletše gomme o rile, “Le na le mahlo gomme ga le kgone go bona, le ditsebe gomme ga le kgone go kwa.” Modimo wa go swana o boletše Lengwalo la go swana.

<sup>59</sup> Re ela hloko, gona, Paulo, kutollo ye kgolo yeo a bilego le yona ya Jesu Kriste, Yo A bego a le, e be e le ye kgolo kudu go tseba. Gabotse, Modimo o e beile ka Beibeleng, ke ka fao e bego e le ye kgolo. Ke ka baka leo a ilego a fiwa mootlwa ka nameng, go kokobetša gore a se be yo mogolo le go godišwa. Modimo o mo kokobeditše, gomme yo monnyane, gore A kgone go mo šomiša ka dikarolong tša go fapanā tša naga, go Mo direla se A bego a nyaka go se dira, gobane o bile le kutollo ya Jesu Kriste, O be a le Mang.

<sup>60</sup> Ka gona elang hloko, selo sese go se dira. Selo sa go latela re se hwetšago, ba Mo laleditše go tla ka gare. O fihlile lefelong le lennyane, ntlong ya baeti ye nnyane moo ba bego ba eya go dula. E be e le go leba mantšiboa, gomme ba rile, “Oo, etla gomme o dule le rena.” O dirile boka O be a eya pele go feta.

<sup>61</sup> Oo, ke naganne seo makga a mantši. O no nyaka le Mo laletše. O dirile boka O be a tla ba feta kgauswi. A ka no dira mo o ka rego O ya go go feta kgauswi, kgaetšedi, ka setulong sa bagolofadi; goba wena, mohlomphegi, ka khoteng; goba wena, ntle kua ka bothata bja pelo, yo a ka se kgonego go phela eupša lebakana le lennyane boteletšana. Batho ba mohlomongwe ba golofetše, ba ka no phela nako ya bophelo ya setlwaedi; eupša yo mongwe ntle kua ka bothata bja pelo, a ka no hwa pele ga moso, a ka no hwa pele ga gosasa. A ka no itshwara boka O ya go go feta kgauswi, eupša O no nyaka o Mo laletše ka gare. Le a bona?

<sup>62</sup> O ka no nagana, “Gabotse, O fodišitše *semangmang*, letšatši le lengwe. Yena, kgwedi ya go feta, ke a tseba, mengwaga ye mebedi ya go feta, ke bone . . .” Ya, A ka no dira mo o ka rego O ya go go feta kgauswi, eupša O no nyaka wena go—go Mo laletša. O dira mo o ka rego O ya go feta. Se A bego a le sona nako yela, ke Yena lehono. Se A se dirago nako yela, O a se dira lehono. O boletše bjalo. Elang hloko, le swanetše go dira selo sa go swana, le swanetše go Mo laletša ka gare. E bile nako yeo, gomme feela nako yeo, gore O kgonne go ikutolla Yenamong.

<sup>63</sup> O be a ka se kgone go e dira ka go ba rerela Lentšu. E ile ka godimo ga hlogo ya bona. Yena a sepelela pele fale, a re, “Gabotse, le swanetše go tseba fale, lena mašilo, pelo ya go tšwafa. Beibele e boletše dilo tše, gore Kriste o swanetše go dira dilo tše, le go ya pele.” Ba sepela go bapa fale, gabotse, go bonala eke ba bone gore ke Yo a bego a le. Yena ga se a ke a tla thwi ntle le go ba botša, “Ke nna Yena.” O hwetša mothaka yo a dirago seo, ka gona o tsebile gore ga go selo go yena, sa mathomo. Eupša O no dumelela Moya wo Mokgethwa go e utolla. O re boditše.

<sup>64</sup> O boditše Mofarisei, o rile, “Puruputšang Mangwalo, ka go Wona le nagana gore le na le Bophelo bjo Bosafelego, gomme ke Wona a pakago ka Nna. A le botša gore Ke nna Mang.” Ba swanetše go e tseba. Kafao ba swanetše go tseba, lehono, ga se sehlopha se lešatakgolo, goba go baka, goba go tšwelapele, goba lešata le lentši. Ke Jesu Kriste a bonagaditšwe magareng ga batho ba Gagwe. Nnete. Lengwalo le bolela bjalo. Hlokamelang, bjale, gomme seo se e dira therešo ge Modimo a bolela bjalo.

<sup>65</sup> Re a hwetša bjale, tsela e nnoši ye A ka kgonago go utolla ke go tla ka go wena. Yena ke, A ka kgona, Yena ke Lentšu. Gomme Lentšu, ka go wena, morago Moya wo Mokgethwa o utolla Kriste, ka Lentšu, morago ga ge A tsene ka go wena. O ka go wena. O swanetše go tsea Lentšu la Gagwe.

O re, “Gabotse, kereke ya ka ga e dumele Leo.”

<sup>66</sup> Go lokile, o ka se tsoge wa tsena ka gare. Le a bona? Ge o gana Lentšu, o a Mo gana.

“Gabotse, kereke ya ka e dumela go e direng ka tsela *ye*.”

<sup>67</sup> Eupsa Beibele e re e direng ka tsela *ye*, *ye* ke tsela. E tšee boka e ngwadilwe fale. E sego se yo mongwe gape a okeditšego go Yona, eupša se Modimo a se boletšego ka yona. Gomme ka gona A ka kgona go e utolla go wena, eupša O swanetše go tsena ka go wena, pele. Morago, gomme feela, A ka kgona go e utolla.

<sup>68</sup> O se eme le go E lebelela le go leka go E nagantšhiša, boka Mofarisei a boletše. Ba eme le go Mo lebelela fale, ba rile, “Monna yo ke Beletsebubu.” Ga se ba kgone go e nagantšhiša. Ba ile ba swanela go e fa leina. Ba rile, “Monna yo o dira se ka moya wa diabolo. Yena, Yena ke Beletsebubu, mmolelamahlatse. Gobaneng, o se be le selo go dira le Moisa yo. O tswetšwe ka sebeng. Ga A na le dikarata tša rena tša kopanelo. Yena ga se wa rena. Gomme, oo, nna, ba... Ebile ga re tsebe moo A ilego sekolong. Ga A ne thuto. Gobaneng, gabotse, Monna yo o tšwa kae? Bjale O re, ‘Morwa wa motho yo a yago go rotogela godimo, o theogetše fase?’ O tswetšwe thwi mo. O tshereane. ‘Ntle le ge le ka ja nama ya Morwa wa motho, la nwa Madi a Gagwe?’ Ke sejabatho.” Gomme O dirile seo go no ba dira ba bolele dilo tše. Ba ile ba swanela go e dira.

<sup>69</sup> Gomme Moya wo Mokgethwa o bjalo, lehono, o bea pele Lentšu la Gagwe, ka ponagatšong, gore batho ba ke ba le ahlole, gore Modimo a ke a bee kahlolo ya Gagwe godimo ga lefase, bjalo ka ge A tshepišitše O tla dira. O thatafaditše pelo ya Farao. Haleluya! O a swana maabane, lehono, le go ya go ile. Yena ga a fetoge. Yena ke Modimo. Ditshepedišo tša Gagwe tša go dira dilo, di laetsa ka Yenamong yo maatla le Lentšu la Gagwe, go Le bonagatša. Ga A swanela go le botša tšohle ka yona. Ga la swanela go e nagantšhiša. O ka se kgone go nagantšhiša Modimo. O swanetše go E amogela. E no Mo memela ka gare gomme o bone se se diregago.

<sup>70</sup> Bjale, re lemoga gape ka fao A itirilego Yenamong go tsebja go bona, morago ga ge A tsene ka gare. O e dirile bjang? O butše mahlo a bona go yo A bego a le. Ge A tsene ka go bona, gona O butše mahlo a bona, go bona.

<sup>71</sup> Bjale ge Lentšu le etla ka go wena, ge o amogela Lentšu la Modimo gomme Le tla ka go wena, gona tshepišo (ya tshepišo yeo o e amogetšego) e iponagatša yonamong, gomme ka gona o tseba Yo a lego.

<sup>72</sup> Ka se A se dirilego, O itirilego bjang Yenamong go tsebja go bona? Gobane O dirile dilo tša go swana tše A di dirilego pele ga papolo ya Gagwe. Ka gona ba tsebile gore yoo e be e le Yena, gobane O tsogile go tšwa bahung. Thero yohle, thuto yohle, le se sengwe le se sengwe gape A se dirilego, se paletšwe. Eupša ge A ikutolotše ka Boyena, a dira selo se se swanago A se dirilego pele ga go bapolwa ga Gagwe, ba tsebile gore e be e le Yena. E butše mahlo a bona.

<sup>73</sup> Ngwanešu, kgaetšedi, O a swana maabane, lehono, le go ya go ile. Ga A fetoge. Feela bjalo ka ge A dirile mosadi mo sedibeng, le a bona, ga A tsoge a fetola lenaneo la Gagwe.

<sup>74</sup> Bjale, mosadi yo monnyane yo mo sedibeng, o tsebile tshepišo ya Lengwalo bakeng sa letšatši leo. Elang hloko ge A etla go mosadi yo monnyane sedibeng. O rile, ka Sikara, O rile, “Mosadi, Ntlišetše seno.”

<sup>75</sup> O rile, “Gobaneng, ga se setlwaedi go lena Bajuda go kgopela rena Basamaria se se bjalo ka seo.”

<sup>76</sup> O rile, “Eupša ge o ka be o tsebile Yo o bego o bolela le yena, o be o tla Nkgopela seno.”

<sup>77</sup> Go lokile, ka gona a gopolia, “Tsebanyane tsoko, ka fao ke tla no Mmotšiša gannyane.” A re, a ya go Mmotšiša.

Thwi O rile, “Sepela o tsee monnamogatša wa gago gomme le tle fa.”

O rile, “Ga ke ne monnamogatša.”

<sup>78</sup> O rile, “Yeo ke nnete. O bile le ba bahlano, gomme yo o dulago le yena bjale ga se monnamogatša wa gago.”

<sup>79</sup> Šetšang! Ka pela, e dirile eng? E tsene ka gare. Ka pela, o tsebile se sengwe. O rile, “Mohlomphegi, ke a bona gore O moprofeta.” Amene. Le a bona, go be go le peu e robetše kua, go tla Bophelong. Go be go le switšhi fao ye e bego e tla gotetša Seetša. Go bona Baifarasei, e be e le leswiswi, sa mathomo; go se na le switšhi, go se na le dipetiri, go se selo gape. Eupša go Monna yo; mosadi yo, mmalegogwana yo monnyane, o rile, “Mohlomphegi!”

<sup>80</sup> Gobaneng? O be a lebeletše ponagalo ya Lentšu. Mengwaga ye makgolonne ge e sa le Maleaki, ba be ba se ne baprofeta, gomme mo go be go le Monna yo a bonagaditšwego go ba

moprefata. Ka pela o tsebile seo e be e le se sengwe. O rile, "Mohlomphegi, ke a bona gore O moprefata." O rile, "Re a tseba gore ge Mesia a etla, seo e ya go ba se A se dirago."

<sup>81</sup> O rile, "Ke nna Yo a bolelago le wena." Bjale A ka kgona go ikutolla Yenamong. O šetše a Mo amogetše. O ka gare bjale, le a bona, A ka kgona go itira Yenamong go tsebja. Ke ka mokgwa wo A itirilego Yenamong go tsebja go lefase, mosadi. Gobaneng? O dumetše Lentšu le le tshepišitšwego, gomme ge a bone Lentšu le le tshepišitšwego le bonagatšwa.

<sup>82</sup> Bjale re a tseba, ka go Doiteronomio tema ya 18, temana ya 15, Moshe o rile, "Morena Modimo wa lena o tla tsoša Moprefata wa go swana le nna." Gomme o tsebile gore Mesia yola o be a eya go ba moprefata. Gomme moprefata wa mafelolo o be a gomile, ye mentši, mengwaga ye mentši pele ga fao. Go be go se baprofeta. Gomme mo go be go eme yo Motee. E be e le eng? E be e le selo sa go latela ka mothalong. E be e le Lentšu. O dirile eng? O le utollotše go yena, ka go mmotša, a utolla gore O be a le moprefata yola, ka go mo utolla se a se dirilego. Oo, nna!

<sup>83</sup> Seo se e rarolotše. O tlogetše moeta wola, gomme a kitimela ka toropongkgolo, gomme o rile, "Lena etlang, le bone Monna Yo a mpoditšego dilo tše ke di dirilego. A yo ga se yena Mesia?" Go mo emiše? Gobaneng, o be o ka se kgone go e dira; e be e le boka go leka go tima mollo letšatšing la phefo, le ntlo ya go oma e eswa. Ee, mohlomphegi, e be e eswa le go lauma. Modimo o be a rathile se sengwe gae. O bone se sengwe. O tsebile e be e le Therešo. Lentšu le be le dirilwe go bonagala pele ga gagwe. Feela tlwa boka go bile go barutiwa moragwana, le a bona, ge A be a leka go ba laetša Lentšu, gomme ka gona a bonagatša Lentšu. Gomme mo o tsebile Lentšu, gomme, ge a Le bone le bonagatšwa, seo se e dirile.

<sup>84</sup> Letšatši le lengwe, monna a bitšwago Andrea o be a šeditše Johane, a mo theeditše a bolela ka Mesia yo a tlago. Petro o be a le ngwanaboo; o be a se ne kgahlego. Ba bile le tate wa kgale wa bomodimo yoo a ba rutilego, "Bjale, morwa, re tshepetše Modimo go se sengwe le se sengwe re se hlokago. Matsatšing ge dikoloto tša rena di be di sa kgone go lefša, re rapetše, 'Modimo, re fe go swara dihlapi lehono.' Re be re tla ya ntłe, gomme Modimo o be a tla re fa go swara dihlapi fao. Gomme ge re hweditše go swara dihlapi fao, re ba re tla dira eng? Re be re tla tla ka gare le go fa Modimo tumišo bakeng sa yona, le go rekiša dihlapi tša rena. Re tshepile Modimo. Ke nna mokgalabje bjale. Go molaleng nka se bone Mesia yo a tlago. Eupša, šetša. Pele A etla, go tla ba le ponagalo ye ntši ya maaka."

<sup>85</sup> Gomme Beibebe e rile e bile gona. "Bokriste ba maaka ba tsogetše godimo." Yeo ke therešo. E be e dira eng? Go leka go tima seetša sa Yena yola wa kgonthe a tlago. Le a bona? Re bile le ditumelothoko tše ntši, dihlapha, le se sengwe le se sengwe

gape se tsoga, gomme se le tšeela godimo Canada gomme se le hlomela ka šelefong felotsoko, godimo lefelong tsoko le lengwe, le go hlahla sehlopha go fapoga ka tsela *ye* le ka tsela *yela*, feela tlwa go ipušeletša gape. E leka go dira eng? E leka go dira eng? O leka go tswalela Seetša sa Therešo. Bjale re ela hloko.

<sup>86</sup> Ka gona letšatši le lengwe, Petro o tlide ntle mašing, go thea dihlapi tsoko, le go hlatswa dinnete tša gagwe. Gomme Jesu o tlide fase. Gomme selo sa pele re a tseba, gore, ka pela ge A etla godimo pele ga moo Petro a bego a le . . .

<sup>87</sup> O be a rutilwe gabotse, se Mesia yola a bego a tla se dira. Tatagwe wa mokgalabje o rile go yena, o rile, "Bjale, Simone, Lengwalo le re. Wena o, o a elelwa, wena o Mojuda. Morena o re boditše, 'Ge go ka ba yo mongwe magareng ga rena, yo a lego wa semoya goba moprofeta, Nna Morena ke tla bolela le yena.' Gomme ge Yena, se A se bolelago e le Therešo, Therešo ye e bonagaditšwego, le se A se bolelago kgafetšakgafetša se etla go phethega, gona le a tseba O na le kutollo Kgethwa ya Lengwalo. Bjale o tla tseba Mesia ge o Mmona."

<sup>88</sup> Kafao o sepeletše thwi godimo ka sefahlegong sa Jesu, letšatši le lengwe. O naganne, "Ke tla ya go bona se Andrea a bego a bolela ka sona."

<sup>89</sup> Gomme ka pela ge a fihlile go Yena; O rile, "Leina la gago ke Simone, gomme o morwa wa Jona." Seo se e rarolotše. Seo se e rarolotše, ka gore o rutilwe ka kua gore O be a tla ba moprofeta. O e tsebile.

<sup>90</sup> Go be go le moithuti yo mongwe yo monnyane o be a ruta; ge Filipi a be a eme fao a bogetše dilo tše di eya pele. O ile go dikologa thaba, ka pela ka kgontha, gomme a hwetša monna yo mongwe, ka leina la Nathaniele, yo a bego a le moithuti wa Beibele, seithuti. Ba be ba ithutile Mangwalo, gobane ba tsebile nako e be e batametše. Ba be ba Mo lebeletše go tla.

<sup>91</sup> Bao ke ba A tlogo go bona, go bao ba Mo lebeletšego. Gomme re hwetša, lehono, ga A tle go bao ba sego ba Mo lebelela. Ga go selo se sebjalo bjalo ka phodišo Kgethwa go—go bao ba sa dumelogo ka go yona. Ga go selo se sebjalo bjalo ka kolobetšo ya Moya wo Mokgethwa go bona ba ba sa dumelogo ka go Wona. E no ba bakeng sa bao ba e dumelago. Yeo ke nnete. Yeo ke phetho. Kafao gona re hwetša, bao ba hlologetšego go tseba Therešo, Modimo o tlamegile go utolla Therešo. O bolela Lentšu la Gagwe, morago a tla gomme a Le phethagatša, a fa tlhathollo ya Gagwe Mong.

<sup>92</sup> Bjale re hwetša, ka pela ge mosadi yola yo monnyane, o rile . . . O be a sa kgone go kwešiša ka fao Monna yo a bego a eba setswerere le yena, o rile, ka go mo fa seno, gomme o rile, goba go Mo tlišetša seno, le go leka go dira botswererere. Gomme selo sa pele le a tseba, gobaneng, o ile a bolela le Yena, gomme, a tla

go hwetša, a re, “Re a tseba Mesia o etla, gomme, ge A etla, O tla re botša dilo tše.”

<sup>93</sup> O rile, “Ke nna Yena, yo a bolelago le wena.” Ka gona mahlo a gagwe a bulega. Mahlo a gagwe a bulega. Ka eng? Tshepišo ya Lengwalo. Mahlo a gagwe a bulega ka tshepišo ya Lengwalo.

<sup>94</sup> Petro o tsebile gore tatagwe o mmoditše gore Mesia yola o tla ba moprefeta. Gomme fa Johane o be a boditše, goba Andrea o be a mmoditše ka ga moprefeta, Johane, o be a le tlase fale a profeta, le go ya pele, a bolela se sengwe se tla direga. Kafao letšatši le lengwe o ile tlase, ka morago ga ge Jesu a tlie. Ge a etla ka Bogoneng bja Gagwe, O rile, “Wena o Simone. Wena o morwa wa Jona.” E be e le eng? Mahlo a gagwe a bulega. O e tsebile.

<sup>95</sup> Filipi le—le Nathaniele ba be ba ithuta Lengwalo ka ga Gagwe a etla. O tlie, a re, “Etlia, bona yo ke mo hweditšego, Jesu wa Nasaretha, morwa wa Josefa.”

“Oo,” o rile, “ga se gona se sebotse se ka tšwago Nasaretha.”

O rile, “Wena etla, o bone.”

<sup>96</sup> Gomme ba ile go dikologa thaba. Ntle le go kamaka eupša se ba bušeeditšego dilo tše ntši tše Jesu a bego a di dira, se A se boletšego go Simone, se A se dirilego, dilo tše A di dirilego.

<sup>97</sup> Ka pela ge Filipi a sepeletše godimo ka Bogoneng bja Gagwe, le Nathaniele, Jesu o lebeletše godimo go Nathaniele, gomme o rile, “Bonang Moisraele yo ka go yena go sego bomenetša.”

O rile, “Rabi, O ntsebile neng?”

<sup>98</sup> O rile, “Pele Filipi a go bitša, ge o be o le ka tlase ga mohlare, Ke go bone.” Mahlo a Gagwe a bulega.

<sup>99</sup> O rile, “Wena o Morwa wa Modimo; Wena o Kgoši ya Israele.” E be e le eng? O bone Lentšu le le tshepišitšwego la letšatši leo le utolotšwe.

<sup>100</sup> Theetša, ngwanešu, kgaetšedi, Lentšu le le tshepišitšwego le ka kgonas go tshepišwa go wena, gomme o ka kgonas go bona ke iri ya leo; eupša ge Modimo a le utolla, a le hlatholla, gona ke sebe go Le gana. O se tsoge wa dira seo. Modimo o butše mahlo a gagwe, ka go mo laetša Lentšu le le bonagaditšwego leo A le tshepišitšego gore le tla direga. Bjale, ka mehla o dira seo ka tsela ya go swana A se dirago, ga nke A fetola tshepedišo ya Gagwe go se direng. Aowa. Kafao, elelwang, ka mehla ya go swana. O tshepišitše Mangwalo bakeng sa lebaka le lengwe le le lengwe, gomme, ge A bonagatša tshepišo yela ya Lengwalo bakeng sa lebaka leo, batho ba ba bulegago mahlo a bona go bona ke bona ba ba e amogelago.

<sup>101</sup> “Bjale, Ngwanešu Branham,” o re, “go ba thari, bjale o ya go reng bjale.”

<sup>102</sup> Tshepišo ya Lengwalo ya lebaka le ke eng, gore re kgone go tseba se re bolelago ka sona? Re mo bakeng sa eng bošegong bjo?

Ke botse bofe e bo dirago? A re phela kgauswi le se sengwe? A ka kgonthre re a se dumela? A re pakile ka lefeela? A re re re a dumela gore O a Tla? A re dumela Bogona bja Gagwe bjo bo bonalago? A re a dumela gore O etla lekga la bobedi? Goba, a re no itira renabeng go tlaetšwa, goba a re e dumela ka therešo?

<sup>103</sup> A re puruputšeng Mangwalo gona gomme re bone se se tshepišitšwego letšatši le, gona re re, boka mosadi mo sedibeng, Filipi le ka moka ga bona, “Re kgona go bona.”

<sup>104</sup> Elelwang, Bahebere 13:8 e rile, “Jesu Kriste o a swana maabane, lehono, le go ya go ile.” A yeo ke nnete? O tshepišitše seo. Leo ke Lengwalo.

<sup>105</sup> Mokgethwa Johane 14:12 e rile, “Yo a dumelago go Nna, mediro ye Ke e dirago o tla e dira le yena.” Ke bea bokamorago bja se sengwe.

<sup>106</sup> Bjale ka go Joele 2:28, le 2:28 le 30, le go ya pele go theoga, O tshepišitše. O rile, “Se mogokong o se šiilego, phatakalala e jele; gomme se phatakalala e se tlogetšego, sa *gore-le-gore* se se jele.” Ye nngwe le ye nngwe ya dikhunkhwane tšela ke khunkhwane ya go swana; e fetola tlhago ya yona. Mogokong ke phatakalala, le go ya pele. E ka go magato a go fapania a leeto la yona, gomme e no ba go ja le go ja le go ja, gomme o jele mohlare wola wa Modimo thwi go theogela kutung. Morago mohlare wola o tla tsoge wa phela gape? Eupša, o be o lebelega o le taba ya go hloka kholofelo, eupša Modimo o rile, “Ke tla bušetša,” go rialo Morena, “mengwaga yohle phatakalala e jelego, mogokong. Se di se jago, Ke tla se tliša morago ka maatleng a sona gape.”

<sup>107</sup> Se Malutheran ba se tlogetšego, Mamethodist ba se jele; se Mamethodist ba se tlogetšego, Pentecostal e se jele; se Pentecostal e se tlogetšego, sa *gore-le-gore* se se jele; go no ya pele go theoga, pele go theoga, pele go theoga; e tee ka *se*, gomme e tee ka *se*, gomme e tee ka *se*, gomme e tee ka *se*, le e tee ka *se*, go fihla e nyamalala ka go feela ka go sehlopha sa diism. Re a tseba yeo ke therešo. Ke ema magareng ga lena, le go le rata.

<sup>108</sup> Eupša, elelwang, ka go Maleaki 4, e sego Maleaki 3 bjale, Maleaki 4, Modimo o tshepišitše go romela tlotšo gape le “go bušetša Tumelo ya bana morago go botate gape.” Gomme ke tlwa se Modimo a se tshepišitše, Joele. E tla dirwa bjang? Re hwetša gore Jesu o rile, ka go Luka 17:26 go ya go 30, O e boletše ka go ya 27 . . . Luka 17, O rile, “Bjalo ka ge go bile ka matšatšing a Noage, ba be ba ejia, ba enwa, ba nyala, ba neela lenyalong; gomme ba se e tsebe go fihla Noage a tsena ka gare. Go tla ba bjalo ka go tleng ga Morwa wa motho.” Eupša O rile, gape, “Bjalo ka ge go bile matšatšing a Loto.”

<sup>109</sup> A le kile la ya morago? Ke duma ge nkabe re na le nako go ya morago le go no utolla seo. Re ye morago ka go Genesi, yeo ke Puku ya go swana Jesu a bego a e bala. Yeo ke Yona A bego a e utolla, a bolela ka yona. Re ye morago kua, re lebelele se A

se boletše. Gomme barwa ba motho... “Barwa ba Modimo ba itšeetše go bona barwedi ba motho.” Basadi, phetolelo ya setlogo ka go Sehebere fale e re e be e le basadi. “Ba tšere basadi,” le a bona, “go bona.”

<sup>110</sup> E nong go lebelela lehono, lebelelang go nyala, le go fiwa ka lenyalong, “gomme ga se ba e tseba go fihla.”

<sup>111</sup> Lebelelang mo, lebelelang ka Engelane, kgobogo ye kgolo ye, lebelelang fa ka United States, lebelelang bommalegogwana, lebelelang se sengwe le se sengwe. Go nyakile go swana le ramotlae a boletšego bošego bjo bongwe, gore, “Basadi ba ne diaparo tša bona go swinelela kudu godimo ga bona, ka maitshwarohlephi kudu ge ba sepela go theoga mokgotha; selo sa go latela ba tla no ba le mošomo wa go peita, ba ka se swanele go šomiša diaparo.” E no ba kgauswi le therešo. Ba lebelele ka fao ba yago go dikologa, ka fao ba lego maitshwarohlephi le ditšila le tšhilatšila, ba a ya. Gomme le tšea, le bolela motlae, gomme la dula magareng ga monna, le se sengwe gape boka seo, gomme le rile, “Tsela e nnoši o ka kgonago go bolela... Ba apara boka monna, gomme monna o apara boka mosadi. Ga o kgone... ba ripa moriri wa bona go swana, go swana. Tsela e nnoši o ka kgonago go bolela yo motee go tšwa go yo mongwe; ge o bolela motlae wa ditšila, monna o tla galoga sefahlego, basadi ba ka se ke.” Ya.

<sup>112</sup> “Gomme ka gona barwedi ba Tsione ba tla sepela ka go ikgogomoša ka matšatšing a mafelelo.” Ba tla šitwa go sepela ka morago ga Morena. Ga go kgathale se o se bolelagoo bona, o ka no rera le go rera le go rera, go no swana le go betha kgahlanong le leboto lela godimo *fale*. Ke leswiswi la kgotlompo godimo ga bona. Ga go... go bonala go le bothata go hwetša monna wa mmapale yo e lego monna, le go hwetša mosadi yo ka nnete e lego mohumagadi.

<sup>113</sup> Lebelelang godimo ga mekgotha lehono, le godimo ga disekrini tša rena, le e ka ba kae e lego, lenaneo le le sego la hlokolwa, go kgoga sekerete, go rogana, go tšwelapele, go apara bjalo ka monna, le dilo. Jesu o rile dilo tše di tla ba, gomme di mo. Ga di nyake go utollwa; di šetše di utolotšwe.

<sup>114</sup> Bjale šetšang, O rile, “Bjalo ka ge go bile matšatšing a Loto,” lebelelang peakanyo ya Loto, Modimo o tlide fase. Gomme ka go banna ba babedi ba ile tlase ka Sodoma le go rera tlase ka Sodoma. Monna yo motee o dutše godimo kua le Abraham, Kereke ye e Kgethilihwego, sekai sa Pentecostal e bileditšwe ntle lehono, e sego ka Sodoma ntle kua.

<sup>115</sup> Bao ba phelago magareng ga Mapentecostal, le basadi ba ba ripago moriri wa bona, le monna yo a tšwelago pele ka mokgwa wola, le go bolela metlae yela ya ditšila, le go tšwelapele, ga se bona Mapentecostal, ba no ba ba rwele leina, “Pentecostal.” Ga

se bona Mapentecostal. Bahumagadi ba mmapale ba Pentecostal ke bahumagadi. Monna wa mmapale wa Pentecostal ke monna.

<sup>116</sup> Dikolo di nyakile go ba le go tswalela, bakeng sa bašemane ba baswa ba fapošitšwego ba fapošwa le dilo boka tše, ka sekolong, mahomoseke gohole godimo mogohle. E no ba ponagalo ya go selekiša! “Bjalo ka ge go bile ka matšatšing a Sodoma, go tla ba bjalo ka go tleng ga Morwa wa motho.”

<sup>117</sup> Elelwang, elang hloko thwi fale, temana yela ya 30, “Ge Morwa wa motho a tla utollwa.” A le kile la ela seo hloko? Šetšang temana yela ya 30, “Ge Morwa wa motho a tla utollwa, ka matšatšing a go swana le ge go bile pele ga Sodoma.” Šetšang se se diregilego ka Sodoma. Monna yo o šetše morago. Ba babedi ba bona ba ile pele tlase, ba boletše le—le Loto, go mo ntšhetša ka ntle ga fale, gomme ga se a—ga se a dira mehlolo tlase kua, o nno ba itia go foulala. Eupsa yo ntle fa o dirile mohlolo, pele ga Bakgethiwa. O bile le mokokotlo wa Gagwe o furaletše Sarah, gomme o be a le ka te—te tente ka morago ga Gagwe. O rile, “Sarah o kae, mosadimogatša wa gago?”

A re, “O ka tenteng, ka morago ga Gago.”

<sup>118</sup> Elelwang, O mmiditše “Sarah,” a mmitša “Abraham.” Letšatši pele ga fao, o be a le Abram; gomme o be a le Sarai, e sego Sarah.

Gomme elang hloko, o rile, “O ka tenteng ka morago ga Gago.”

<sup>119</sup> O rile, “Ke ya go go etela.” E be e le eng? Modimo nameng. “Ke ya go go etela go ya ka tshepišo.”

Gomme Sarah a sega, gomme a re, “Dilo tše di ka se kgone go ba bjalo.”

<sup>120</sup> O rile, “Gobaneng Sarah a segile, a re, ‘Dilo tše di ka se be?’” O mmoditše se a bego a se dira. Yena e le Lentšu ka nameng ya motho, o tsebile diphiri tša pelo ya gagwe, gomme o rile, “O segile!”

<sup>121</sup> Gomme ge A dirilwe nama lefaseng, seo ke tlwa se A se dirilego.

<sup>122</sup> Gomme O boletše eng? “Ge Morwa wa motho a utollwa ka matšatšing a mafelelo, go swana le ge go bile ka matšatšing a Sodoma.” Ge Basodoma ba le gohlegohle nageng, lefase ka moka le hlakahlakane gomme le ile, gomme re bona kereke e ile, gona ke nako gore Morwa wa motho o ikutolla Yenamong: wa go swana maabane, lehono, le go ya go ile. Yeo ke tshepišo ya Modimo.

<sup>123</sup> Šetšang se A se boletšego. “Lebakana le lennyane, gomme lefase ga le sa Mpona gape; efela lena le tla Mpona, gobane Ke tla ba le lena, ebile ka go lena. Le tla Mpona; modumedi.” Wa go swana maabane, lehono, le go ya go ile! Ee. “Lebakana le lennyane, gomme lefase ga le sa Mpona gape.” Le ka se kgone go Mmona; mahlo a bona a foufetše.

<sup>124</sup> Eupša ge o bona Morwa wa motho a utolotšwe, Lentšu le tla morago ka nameng ya motho! Monna yo a jago nama ya namane, a nwa maswi go tšwa kgomong, a ja dinkgwa tše di dirilwego ka onto, gomme a bitšwa “Elohim,” amene, Monna a apere diaparo tša lerole, Modimo a bonagaditšwe nameng. Šole o be a le lefaseng, a bonagaditšwe nameng, gomme a re, “Bjalo ka ge go bile bjalo matšatšing a Sodoma, ge Morwa wa motho a utollwa ka matšatšing a mafelelo, lefase le tla ba ka leemong la Sodoma,” gomme še yona. Ngwanešu, kgaetšedi, bahumagadi le bakgomana, eng kapa eng le ka bago yona, ye ke iri, gomme tlhathollo ke ya Modimo. A nke Modimo a bule mahlo a rena a foufaditšwego go tshepišo ya Lengwalo, re tsebe gore re phela ka matšatšing a mafelelo. Amene!

A re inamišeng dihlogo tša rena.

<sup>125</sup> Tate wa Legodimong, bontši kudu bo ka bolelwa. Seo se lekanetše. Ke tla ema. Morena Modimo, Yo a dirilego tshepišo, etla go lefelotiragalo, Morena, e utolle. Nama ya rena ga se ya loka, nama ya rena e a fokola, gomme ke—ke ya go šokiša, Morena. Ga se gore go be le e ka ba mang a nago le maswanedi. Ga re na maswanedi, Morena. Eupša O e tshepišitše, gomme iri e fa. Lentšu le ema pele ga rena. Sepela tlase le rena, Morena, bošegong bjo, le go dira se sengwe boka O se dirile ge O be o le morago fale lefaseng, mengwaga ye dikete tše pedi ya go feta, gore kereke ye e ke e tsebe bošegong bjo gore o phela go ya go ile, gore O a swana maabane, lehono, le go ya go ile, gomme o tshepišitše mediro yeo O e dirilego e tla bušeletšwa gape. “Morwa wa motho o tla utollwa ka matšatšing a mafelelo, bjalo ka ge go bile ka Sodoma.” Morena, ga se nke O bolela seo (ka ga Loto) ka ga Noage. Wena ga se nke wa bolela gore O tla utollwa mo nakong ya Noage, eupša o rile, “Bjalo ka ge go bile ka Sodoma, ge Morwa wa motho a utollwa.” Oo, a ka kgona . . .

<sup>126</sup> Morena, a nke babadi ba Beibele fa bošegong bjo ba bone Therešo. A nke ba bone gore Maleaki 4, gore tlotšo ye e swanetše go tla, le go bušetša morago gape Tumelo yela yeo botate ba kilego ba e bona, kutollo ya Modimo ka go Kriste. Bjale a nke ba bone kutollo ya Modimo ka go batho, Kriste a bonagaditšwe ka nameng ya Kereke ya Gagwe, a sepela magareng ga rena. E fe, Morena. Ditshepišo tše O di dirilego, le ditshepišo tše O tla di bolokago. Gomme ke ikgafela kabonna, le Lentšu, le kereke, le bohle, go Wena bjale, Leineng la Jesu Kriste.

<sup>127</sup> Ka dihlogo tša rena di inamišitšwe, a go ka ba ba bangwe mo, pele re eba le mothalo wa thapelo, ba ka rego, “Ngwanešu Branham, ga—ga se nna Mokriste. Ke—ke—ke—ke nyake go phološwa. Nthapelele, a o ka dira, Ngwanešu Branham?” E no phagamišetša seatla sa gago godimo. “Ke tla e dira.” Ge o no ba mo, gomme o se Mokriste. Modimo a go šegofatše, mohlomphegi. Modimo a go šegofatše, lesogana. Modimo a go šegofatše, mohlomphegi. Seo ke se sebotse. E no ba . . . Modimo a

go šegofatše, mohumagadi. Modimo a go šegofatše, mohumagadi. Modimo a go šegofatše. Seo ke therešo. Modimo a go šegofatše, morago fao, mohlomphegi. Modimo a go šegofatše. Seo ke se sebotse.

<sup>128</sup> Yo mongwe gape e no phagamiša seatla sa gago, e re, “Ga ke Mokriste”? Modimo a go šegofatše. Ke go bone morago kua, lesogana. Modimo a go šegofatše, moragorago kua. Gomme godimodimo mo ka khoneng, ee, Modimo a go šegofatše. “Ga se nna Mokriste, Ngwanešu Branham, eupša ke a dumela gore o bolela Therešo. Ke a dumela ke Therešo. Ke a dumela tshepišo e bolela seo. Ke badile, gomme ke bona gore tshepišo e tshepišitše seo. Ga se ka ke ka e bona, eupša ke—ke—ke a e dumela.” Modimo a go šegofatše, mohumagadi yo moswa. E no ba yo mongwe?

<sup>129</sup> Ge o phagamiša letsogo la gago, seo se dira se sengwe go wena. Ka kgontha se a dira. Se go fa maikutlo gore o dirile se sengwe seo se lokilego. Ga go motho a beilego diatla tša bona godimo . . . Ke a le bona, moragorago ka morago. Ee. Ga go motho yo a beilego diatla tša bona godimo eupša . . . Modimo a le šegofatše. Ke a le bona fao, gape, le lena mo. Ee. Nna, seo se lokile. Elelwa, ge ke foša go bona seatla sa gago, O tla go bona. O tseba tšohle ka sona. Elelwang, O a tseba. Modimo a go šegofatše, kgaetšedi yo moswa. O a e tseba.

<sup>130</sup> Tate wa rena wa Legodimong, ke ba Gago bjale. Ba be ba ka se kgone go emiša seatla sela; go na le Selo se sengwe se ba boditšego go se dira. Gomme efela, mohlomongwe, ga a gona wa bona a kilego a bona maswao a go bonala a go ikgetha a Bogona bja. Gago mo lefaseng mo matsatsing a mafelelo, eupša ba e bona fa, Lengwalo le boletše bjalo, gomme a nke ba kwešiše bosegong bjo. Gore, ebile le Beibele e rerilwe lebaka la mengwaga yeo yohle, gomme, go le bjalo, batho ga ba dumele. Eupša ge O bile le Kleopa le mogwera wa gagwe, gomme morago o retologile gomme o dirile se sengwe feela ka tsela ye o se dirilego ge O be o phela lefaseng pele ga papolo, ba tsebile yoo e be e le Jesu wa go swana. Bjale, Morena, dira sa go swana go rena bosegong bjo. Dira, bosegong bjo, bakeng sa batho ba ba babjago, feela boka O dirile pele ga papolo ya Gago; gona, ka morago ga mengwaga ye dikete tše pedi, banna le basadi ba tla tseba gore O a phela. Re letetše go Wena, Tate, ka la Jesu Leina. Amene.

<sup>131</sup> Bjale go lena bao le phagamišitše diatla tša lena, ke nyaka le dule thomphokgolo ka kgontha lebaka la metsotsotso e se mekae. Ke ya go bitša mothalo wa thapelo. Ga ke re Modimo o tla e dira. Eupša ke nyaka go le botšiša potšišo ya potego, batho. Bjalo ka ge go le, oo, makgolo a mmalwa mo, goba makgolotlhano goba makgolotshela, goba e ka ba eng e lego, lebelelang, bao ke—bao ke batho ka moka ba bantši. Eupša, lebelelang, ke nyaka go le botšiša se sengwe. Re na le boikarabelo go Modimo. Re nabjo. Gomme O na le boikarabelo ka Lentšu la Gagwe. Bjale ge A dira Lentšu lela go phela gape, o—o—o—o . . . Ke nyaka yo mongwe le

yo mongwe yoo a phagamišitšego seatla sa gago, gomme wena o sego wa phagamiša seatla sa gago, ka pela ka morago o tle mo le go ema aletareng, feela ka pela ge re rapelela balwetši.

<sup>132</sup> Billy o kae? A . . . Tee, karata ya thapelo D, tee go fihla ka lekgolo? Go lokile. A re, re itlhaganetše, kafao re tla no thoma go tloga nomoro tee. Karata ya thapelo D, nomoro tee, yo a nago le yona, phagamišetša seatla sa gago godimo. Lebelela ka go karata ya gago ya thapelo, bona se e lego sona. Ge o sa kgone go sepela, gobaneng, ba bangwe ba lena ba ya tlase kua kafao o . . . D, nomoro tee, pedi, tharo, nne, tlhano, emeolang thwi *fa*, ge le rata. Tee, pedi, tharo . . . Ge o sa kgone go sepela, phagamiša diatla tša gago, gomme ba tla go rwala. Tee, pedi . . . Ke bona feela o tee, bokgole bjo. A le ka tla ka pela, feela ka pela ka mo le kgonago, tee, pedi, tharo, nne, tlhano.

<sup>133</sup> Ge yo mongwe a ka e bolela ka Spanish; ke a bona go na le batho ba bantši ba Spanish. D, tee, pedi, tharo, nne, tlhano. Tee, pedi, tharo . . . Go lokile, go ne tharo. Tee, pedi, tharo, nne, go ne yo mongwe. Nomoro tlhano, ke mang a nago karata ya thapelo nomoro tlhano? Phagamišetša seatla sa gago godimo, yo mongwe. O tla e bolela bjang ka Spanish? A yeo ke karata ya thapelo nomoro tlhano, mohlomphegi? [Ngwanešu o re, “Cinco.”—Mor.] Huh? [“Nomoro cinco, nomoro cinco.”] [Ngwanešu yo mongwe o re, “Tlhano še.”] Sele e e hweditše. Ke a le leboga. Tee, pedi, tharo, nne . . . Gona, gabotse, ke efe e hlaelago? [“Bohle fale, tlhano.”] A go ne ba bahlano fale? [“Ee.”] Ya, ke a bona bjale. Ga se ke mmone a eme ntle fale. Go lokile.

<sup>134</sup> Tshela, šupa, seswai, senyane, lesome. E re . . . [Ga go selo godimo ga theipi. Ngwanešu o re, “Seis, siete ocho, nueve, diez.”—Mor.] Bjale emang fa feela motsotso. Tshela, šupa, seswai, senyane . . . Yeo ke yona. Lesometee, lesomapedi, lesometharo, lesomenne, lesometlhano. [“Once, doce, trece catorce, quince.”] Yeo e lokile. Yeo e kaone. Motsotso feela, a re bitšeng di se kae gape. Lesomešupa, lesomeseswai, lesomesenyane, masomepedi. Tee go fihla ka masomepedi. Thoma? Tee, pedi, tharo, nne, tlhano, tshela, šupa, seswai, senyane . . . lesometharo, lesomenne, lesometlhano, lesometshela, lesomešupa, lesomeseswai . . . Yeo ke yona. Go lokile, yeo e kaone. Yeo e lokile go lekanelia. A re thomeng ka bona. Ke a go leboga, ngwanešu.

<sup>135</sup> Ke ba bakae mo ba se nago karata ya thapelo, emiša seatla sa gago, gomme go le bjalo o a babja? Bjale elelwa, ga wa swanelia go ba godimo fa. Ga wa swanelia go ba fa. E no dumela.

<sup>136</sup> Bjale a nke yo mongwe le yo mongwe a be le tlhomphokgolo ka kgonthe. Ke ya go kgopela, ka Leina la Jesu, gore ga go yo a hiduegago lebaka la ya go latela, e ka ba metsotso ye lesome, lesometlhano, go le bjalo, metsotso ye lesome goba lesometlhano. A re nong—a re—a re feng Modimo tlhompho yela—yela ye kgolo. Yo mongwe le yo mongwe o dudišega thwi fase. A re homoleng

ka kgonthe bjale. Feela nakwana, gomme o tla ba le mothalo fa. Bjale ge a, ba letile fale, ntheetšeng kgauswi bjale.

<sup>137</sup> Bjale a le lemoga moo ke emego fa? Ke ba bakae ba kwešišago se ke rerilego ka sona? Le a bona? Gomme ke tteleimile gore O tsogile go tšwa bahung. Bjale O tsogile go tšwa bahung, gomme o tshepišitše go dira se. Bjale ga se ya ke ya ba ka go mengwaga ye e itšego ge e sa le go tloga go baapostola, go fihla nako ye, bokgole bjo re bo tsebago, eupša O tshepišitše ka nako ye, “Morwa wa motho o tla utollwa boka go bile ka Sodoma.” Bjale le bala seo ka go Luka 17, e ka ba 20 go ya go 30, gomme le bone ge seo e se nnete. O e tshepišitše.

<sup>138</sup> Balang Maleaki 4. Le se e hlakanye le Maleaki 3, bjale. Maleaki 3 e be e le Johane Mokolobetsi. Le a bona? Eupša Maleaki 4, ka pela ge se se fedile, ba bab- . . . baloki ba sepelela ntle godimo ga ba babe, gomme lefase le tshungwa ka mollo, le a bona. Ga se nke ya direga mo matšatšing a nako ya Johane. Re letetše tlotšo ye kgolo yela godimo ga Kereke, yeo e tla retollelago dipelo morago go Thuto ya setlogo ya botate, morago go pentecost ya kgonthe ya mmapale.

<sup>139</sup> Go lokile, ebang le tlhomphokgolo. Billy, goeletša ka pela ge o ba dira bohole ba be mothalong, tlase fale. Go lokile, bohole komana? Gabotse. Bjale, tlhomphokgolo ka kgonthe. Yo mongwe o ya go thuša, a sepela go bapa. Bjale yo mongwe le yo mongwe homolang ka kgonthe, feela metsotsso e se mekao.

<sup>140</sup> Ke nyaka le ntirele tshepišo. Ke tshepišitše Modimo gore ke . . . Gomme O tseba pelo ya ka gomme O tseba ya gago. Bjale, ke no tlamega go bolela se, se e lego Therešo. Seo ke sohle ke tlamegago go se dira. Modimo o E ngwadile; ga se ka tsoge. Ga se nna, ga se nna; ke Beibele. Le a e tseba. Bjale ge A ka utolla seo, a seo se ka se Mo tliše thwi mo a phela magareng ga renā? Le a bona?

<sup>141</sup> Go ka reng ge o be o se ne sekwi sa pono, go se yo a dirilego, gomme o be o tla sepelela ntle ka go phadimo ya letšatši. Dinako tše dingwe o be o ka se tsebe moo o bego o sepela, gobane o be o foufetše. Gomme o sepetše ka go phadimo ya letšatši, o ikwela se sengwe sa kgonthe go go dikologa, borutho ka kgonthe, ka gona ka morago ga lebakana o be o tla sepelela ka moriting, gomme o be o tla re, “Ga e gona bjale.” Ga go yo motee a kilego a tseba gore letšatši e be e le eng, a sego a ke a ba le sekwi sela sa pono, le a bona, o be o ka se tsebe gore e be e le eng.

Yo mongwe o re, “Seo ke seetša sa letšatši.”

<sup>142</sup> “Seetša sa letšatši ke eng? Seetša ke eng, gomme letšatši ke eng?” Le a bona, ga se wa ke wa kwa ka sona. Le a bona?

“Gabotse, ke seetša seo se tlago fase.”

“Seetša ke eng?” Le a bona?

<sup>143</sup> Bjale yeo ke tsela. Re ikwela Bogona bja Modimo, gona, gomme ga re Bo kwe, gona re sepela ka go Bjoo. Le a bona? Gomme o ka go se—se sekgao seo o se bonago. O ka bolela se E lego. Le a bona? O tseba se Seo se lego.

<sup>144</sup> Bjale, ge Modimo a tsogile go tšwa bahung gomme a le mo bošegong bjo, O e tshepišitše. Bjale mmele wa Gagwe wa nama o dutše godimo ga Terone ya Modimo; O tsera, o dutše fase godimo ga Terone ya Modimo. Eupša Moya wo Mokgethwa o fa, e lego Kriste, ka sebopego sa Moya. Lentšu Kriste le ra “Yena motlotšwa.” Gomme tlotšo yela e be e le godimo ga Gagwe, e godimo ga Kereke, rena bohle. Bjale e nno tšwelapele e etla, go tloga go tokafatšo, tlhwekišo, kolobetšo ya Moya wo Mokgethwa, pušetšo ya dimpho, thwi go theoga, go ya ntlhoreng ya yona. Nnete. E tla ka bonnyaneng nako yohle, e mmogo bjale. Gomme bjale kereke šele, gomme bjale Monyalwa o tla tšwela ka ntle ga kereke; le a bona, kereke e ya go kgabola sekgao sa tlaišego, e sego Monyalwa. Ntshwareleng, ga ka swanelia go rera thuto. Tshwarelo. Go lokile.

Yo ke mohumagadi. Etla fa.

<sup>145</sup> Elang hloko, ga ke dumele gore go motho ka mo yo ke mo tsebago, yo ke mo lebeletšego. Ge yo mongwe le yo mongwe wa lena fa le le basetsebje go nna, phagamišang diatla tša lena, o a tseba ga ke tsebe selo ka wena; gore batho ke basetsebje ka mo.

<sup>146</sup> Bjale, hle, hle le se ke la sepela go dikologa. Dulang ka go iketla, a le tla dira?

<sup>147</sup> Bohle ba ba lego ka mothalong wa thapelo, ba ba sa ntsebego, gomme o a tseba ga ke tsebe selo ka wena, phagamiša diatla tša gago. Ke rena bao.

<sup>148</sup> Bjale fa go dutše sehlopha sa badiredi. Le a bona, e no ba thwi ntla fa moo bohle re ka go lebelela, le a bona.

<sup>149</sup> Bjale mohumagadi yo mo ke mosetsebje go nna. (Bjale e ka ba mang a lego go yeo, raentšeneere, šetša segodišantšu sela, bjale.) Go lokile, bjale ke ya go bolela le yena. Mo, mo go tla morago, Mokgethwa Johane 4, moo Jesu a boletšego le mosadi le go mmotša se bothata bja gagwe e bego e le bjona, gomme o dumetše leo e be e le leswao la Mesia. Ge leo e be e le leswao la Mesia nako yela, e sa le leswao la Mesia, gobane O a swana maabane, lehono, le go ya go ile. A yeo ke nnete? O kopane ka mokgwa wo.

<sup>150</sup> Bjale, ga se nna Jesu, gomme ntla le go kamaka mosadi yo mo ga se mohuta wola wa mosadi. Eupša se ke lekago go se bolela, se a swana; monna šo o kopana le mosadi, gomme ka gona se sengwe se fošagetše fao, gomme ge se sengwe se ka tla ka mo go se utolla, seo se laetša gore e swanetše go ba Modimo. Bjale ke be nka se tsebe, gobane ga—ga se nke ka ke ka bona mosadi bophelong bja ka. Le a bona? Gomme o phagamišitše seatla sa

gagwe gore ke be ke sa mo tsebe, gomme ga a ntsebe, gomme fa re no ema fa.

<sup>151</sup> Bjale ke no nyaka go bolela le wena motsotso, ka morago ga ge ke be ke bolela ka mokgwa wola, ke rera, kgaetšedi. Gomme ge seo e le . . . Kafao, o a bona, e tee ke therò, ye nngwe ke tlotšo, se sengwe gape.

<sup>152</sup> Bjale ge Morena Jesu a be a ka kgona go ntlhalošetša, goba a mpontšha ka pono, se sengwe seo o se nyakago, se sengwe seo mohlomongwe e ka bago bolwetši, e ka no ba tša ditšhelete, e ka no ba tš selegae, e ka no ba bakeng sa yo mongwe gape. Ebile ga ke tsebe, o a bona, ga ke ne kgopoloo e ka ba efe. Eupša ge A ka mpotša se sengwe seo—seo e lego phošo, goba se sengwe se fošagetše ka bophelong bja gago, goba—goba se sengwe, gomme ke o babja gampe, goba yo mongwe gape o a babja, goba se sengwe se fošagetše. Ge A be a ka e bolela, o be o tla tseba ge eba e be e le therešo goba aowa. Wena, o ka bolela ge eba ke therešo goba aowa. Gabotse, ge A tseba se se bilego, gona ka kgonthe O tseba se se tla bago. Ge A ka kgona go bolela tša go feta, A ka kgona go bolela tša bjale le tša ka moso. Bjale a e tla go dira o dumele ka pelo ya gago yohle, gore o tla hwetša se o se kgopelago?

<sup>153</sup> A e tla dira batheeletši go dumela gore ba tla hwetša Se se . . . ? . . . [Phuthego e re, “Amene.”—Mor.] Bjale le se sepele go dikologa bjale. Ke no be ke letile le go bona, go bona se A tla mpotšago, gobane ga ke tsebe. Ke no, kopano ka morago ga kopano, ke a tšhoga, le a tseba, le go rera, le go hlaganelo, le go ſetša se le se o se tshepiſitšego, gomme ke swanetše go le ntšha fale ka senyane masometharo; e nyakile go ba ka nako yeo bjale; go ntira ke tšhoge, kafao ke no swanelo go ikokobatša nnamong. Le a bona? Ke . . .

<sup>154</sup> Mpho ga se se sengwe go swana le ge o tšea thipa gomme wa rema se sengwe. Yeo ga se mpho. Mpho ke go itloša tseleng wenamong gore Moya wo Mokgethwa o kgone go go šomiša. Gomme seo ke selo se nnoši ke swanetše go se dira, ke go hwetša William Branham go tloga go lefelotiragalo, le a bona, gore Modimo a kgone go tla pele.

<sup>155</sup> Bjale, Leineng la Jesu Kriste, ke tšeela moya wo mongwe le wo mongwe ka mo ka tlase ga taolo ya ka, bakeng sa letago la Gagwe, gore Mantšu ao ke a rerilego a ke a bonagatšwe. O fa bjale. Ke—ke duma nka le botša ka fao go lego. Nna, oo, nna! Ge A be a ka mpotša gore gosasa mosong go ya serapeng sa mabitla a Dipresidente le go tsoša George Washington, ke be ke tla le botša go tla le e bogele. Feelà se A tla se bolelago bjale. Le a bona? Ga ke tsebe se A be a tla se bolela, eupša, se A se bolelago, e tla ba therešo.

<sup>156</sup> Mohumagadi o tlaišega ka bothata ka mahlo a gagwe. O na le bothata ka mahlo a gagwe. Bo a mo tshwenya. O na le bothata

bja mokokotlo bjo bo mo tshwenyago. O tšhogile, o tšhogile go fetiša. Nneta. A yeo ga se nnete? Ge yeo e le nnete, phagamiša seatla sa gago. E re, selo se sengwe, o modiredi wa mohuta wo mongwe, o bjalo ka mosadi... O moreri wa mosadi. Seo ke se se lego. Bjale o dumela ka pelo ya gago yohle, sepela, gomme o ka ba le se o se kgopetšego.

A le a Le dumela?

<sup>157</sup> Etla, mohlomphegi. Re basetsebane yo motee go yo mongwe, ke a naganana. Morena o tseba bobedi bja rena. A o a dumela gore Modimo a ka mpotša? Bjale, yola e be e le mosadi; monna šo. A o a dumela gore Modimo a ka mpotša se bothata bja gago e lego? A go tla go dira o dumele? O tlaišega ka letšhogo. Gape o na le bothata ka mahlo a gago; a ya go fifalafifadi nako yohle. E be e dira seo nakwana ye nngwe. Selo se sengwe, ke bona se sengwe godimo ga letsogo la gago. Oo, ke kgatelelo ya gago ya godimo ya madi. Seo ke se e lego sona, o na le kgatelelo ya godimo ya madi. Yeo ke nnete, a ga se yona? Gabotse, phagamišetša seatla sa gago godimo ge tšona dilo e le nnete.

<sup>158</sup> Bontši ge o bolela le yena, bontši go tla ba, le a bona. Bjale šetša, lebelela, šetša. E no iša seatla sa gago fase. Ga re ne bontši kudu fale; nno iša seatla sa gago fase. Bjale, ga ke tsebe se ke se boletšego go yena, eupša e rekotong fao, le a bona, ke ka mokgwa wo e lego godimo ga theipi. Ga ke tsebe se A se boletšego.

<sup>159</sup> Eupša a re boneng bjale. Ee, ke mahlo, seo ke sa selo se tee. Gomme ka gona, selo se sengwe, o na le go kgahla ga madi gomme go godimo ga bjoko, gomme o bile le strouku. Yeo ke therešo. Gabotse, a o a dumela bjale? O a dumela o ya go ba gabotse? A o a dumela gore yoo ke Modimo a bolelago, e sego nna? Go lokile, gona sepela, e dumele. Seo ke sohle o swanetšego go se dira, e no ba go dumela. Ge ba ka no dumela, ke phetho. Ge ba ka no dumela, go fedile.

<sup>160</sup> O dira bjang? A o a dumela gore Modimo a ka nkutollela bothata bja gago? [Kgaetšedi o re, "Ee, ke a dira."—Mor.] Gomme ge A ka kgona, a e tla go dira o Mo dumele? ["Ee."] E tla dira. O boifa eng? Nka se kgone go bolela, a o ka kgona? Boka e no ba leswiswi, letšhogo. Gomme ka gona selo se sengwe, o na le bothata ka molaleng wa gago. Yeo ke therešo. Bothata bja gago bo ka molaleng wa gago. Ka gona o na le yo mongwe pelong ya gago, yo o mo rapedišago. O na le bothata bjo bontši ka yona. Gomme bjoo ke ka alekoholo. Ke monnamogatša wa gago. Ke segatamoroko. Gomme o a mo rapediša. O dumela bakeng sa gagwe? ["Ee, ke a dira."] Gona ke tla rapela gore Jesu Kriste o tla go direla dilo tše. Go lokile.

<sup>161</sup> A o a dumela? Bjale seo, ka kgonagalo, nnete... Ba babedi bao, ba bararo, goba eng, ba bane, eng kapa eng e fetilego, seo ke bontši bjo Jesu a bo dirilego ka Beibeleng yohle. Le a bona? Yeo ke nnete. O e dirile go mosadi, o boditše mosadi yola selo se tee,

gomme O ile tlase Sikara; Yena ga se nke a bolela selo se sengwe gape go e ka ba mang tlase fale, eupša ba dumetše ka lebaka la bopaki bja mosadi. Ya. Mosadi yola ga se a swanelo go paka go wena; o ema thwi mo o e lebeletše, ka bowena. O swanetše go no dumela. Nnete, ba bangwe ba ka se dumele, ga go selo ka go bona go dumela ka sona.

<sup>162</sup> O dira bjang? Bjale, re ba go se tlwaelege. A nka se be motho wa go šiiša a emego fa ge . . . Mosadi wa go ratega wa hlogo ye pududu boka yoo, gomme a nagana ka dilo, gomme mme wa ka yo bohlokwa a ka be a bile e ka ba bogolo bjoo, gomme o nno feta fa mengwaga ye mmalwa ya go feta. Gomme ge e ka ba eng nka kgonago go e dira go thuša mohumagadi yola wa go šokiša, ke tla e dira. Ke a tseba, ge—ge a babja, ge nka kgona go tšeа le—le go kgorometše khoine ka nko ya ka go dikologa toropokgolo ye, ke tla e dira. Ga ke kgathale ke mang a bego a ka ntshega. Ke—ke nyaka a fole. Ge ke be nka kgona go mo thuša, ke be ke tla dira bjalo. Eupša nka se kgone go mo thuša. Gomme bontši bjo A bo dirilego, Modimo o be a šetše a dirile seo. Gomme O go rata kudu go feta ka mo ke dirago. O go hwetše; gomme ga se nke ka dira seo. Eupša O go ratile go lekanelo go go hwela.

<sup>163</sup> Eupša ka gona O nthometše morago, feela mpho ye nnyane. O rometše modiša wa gago fa go rapela le go bea diatla go balwetši, gomme, o a bona, seo se dirilwe bontši kudu ka go tsošeletšo, gore seo ke mohuta wa go feta, o a tseba, gomme bjale e godimo ka go tše dingwe, o tseba se ke se rago, mašakana, se sengwe gape.

<sup>164</sup> Bjale ge Morena a ka nkutollela seo bothata bja gago e lego, o ntumela go ba moprofeta wa Gagwe, goba mohlanka wa Gagwe? A o a dumela ke Yena? [Kgaetšedi o re, “Ee. Ke a e tseba.”—Mor.] Wena, wena, gabotse, ke a go leboga, kgaetšedi. Bjale ke a dumela bothata bjola bja pshio o bego o tlaišega ka bjona bo tla go tlogela. A o dumela seo, le wena? O na le kgopelo ka pelong ya gago, o nyaka go nkgopela. Go ka reng ge nka utolla kgopelo yeo pele o nkgopela, a o tla, go go dira gore o dumele go fetiša? [“Nnete.”] O nyaka ke rapediša morwedi wa gago. Ga a gona fa. Yeo ke nnete. O nyaka ke utolle se bothata bja gagwe e lego? Ke letšhogo la kgonthe. Bjale o a dumela, gomme o tla fola. O a bona? Modimo a go šegofatše, kgaetšedi.

“Ge o ka kgona go dumela, dilo tšohle di a kgonega.” Le a bona?

<sup>165</sup> Lentšu la Modimo le dira eng . . . Bonang ge eba badiredi ba ga ba bolele se. Beibele e boletše, ka go Bahebere, Testamente ye Mpsha, tema ya 4, “Lentšu la Modimo ke le bogajana go feta tšoša ya magalemabedi, le ripa go aroganya, ebole go fihla mokong wa lerapo, le mohlathi wa dikgopololo, dikelello tša pelo.” A ke nnete, baena? Le a bona?

<sup>166</sup> Ke eng? Ke Lentšu le le abetšwego letšatši le. Lentšu le abetšwe letšatši le, go phethagatša tshepišo ye, “Ge Morwa wa

motho a tla utollwa, matšatšing a Sodoma, dilo tšohle tše dingwe tše di tshepišitšwego,” šele lona, ke Lentšu la Modimo le utollwa, gobane ke Lentšu Lonamong le hlatha dikgopolo tše di lego ka pelong. Le a bona? Yeo ke nnete tlwa.

<sup>167</sup> Bjale, mohumagadi yo, ga ke mo tsebe, motho yo mongwe wa go bogega botho. Ke be ke tla ba eng, motho wa go befa, ge ke be nka kgona go thusa le . . .

<sup>168</sup> Bjale feela nakwana. Yo mongwe gape, e be e le monna, e be e le monna a tšweletše, gomme yo mongwe ntle fale a rapela. E no ba le tumelo. Ke—ke a bona bjale ke . . . Ke tla no swanelo go bolela se ke se lebeletšego. O a bona, seo ke sohle nka kgonago go se bolela, ke seo—seo ke se bonago.

<sup>169</sup> Wena o, ee, o tlaišega ka seemo sa mogodu. Ke ka mogodung wa gago. Gona o nyaka go nkgopela kgopelo, gomme yeo ke bakeng sa mmago. Ga a gona fa, eupša o a babja. O nyaka ke mo rapediše. A yeo ga se nnete? O na le kgopelo ye nngwe. Ke bakeng sa . . . Ke yo mongwe yo a sego mo. Ke kgolekgole go tloga mo. Gomme ke a bona ke tsela . . . Ke ka nageng ye nngwe. Ke kgole kudu go tloga fa. Gomme ke—ke motho yo moswa, ngwana a tlaišegago ka mohuta tsoko wa bolwetši, bolwetši bja tropiki. Amerika Borwa, yeo ke tlwa. E godimo ga gago. Yeo ke therešo tlwa. Nnete. Eupša dumela ka pelo ya gago yohle bjale.

<sup>170</sup> Ga ke fodiše. O šetše a fodišitšwe. A ga le kgone go lemoga gore ke Bogona bja Gagwe gape? Ke tla no tšwelapele ke eya pele le pele, bjale e thoma go mphoufatša gannyane, le a bona.

Le re, “Seo?”

<sup>171</sup> Gabotse, ngwanešu, kgaetsedi! Jesu, mosadi o kgwathile seaparo sa Gagwe, O retologile go dikologa le go bona se e bego e le sona, gomme O rile, “Bokwala bo tlogile go Nna.” A yeo ke nnete? Gabotse, O be a le, yoo e be e le Modimo. Go reng ka nna, modiradibe? O swanetše go dumela. O se belaele. Dumela. Ye ke . . .

<sup>172</sup> A o a dumela? Mosadi yo moswa, gomme o a dumela gore Modimo a ka nkutollela seo bothata bja gago e lego? Gabotse, a o ka, a o tla e amogela le go e dumela ka tšohle tša gago . . . O a tseba e tla ba therešo. O a bona? Bjale selo se tee e lego bothata bja gago, bo ka mokokotlong wa gago, o na le bothata bja mokokotlo. Gomme gona o ne tlhologelo ye kgolo ka pelong ya gago, bakeng sa se sengwe, gomme, ke, o nyaka kolobetšo ya Moya wo Mokgethwa. Yeo ke nnete tlwa. A o a e dumela? Gabotse, o ya go E amogela. Amene. Bjale eya pele gomme o e dumele ka pelo ya gago yohle, gomme o tla amogela kolobetšo.

<sup>173</sup> A o dumela gore Modimo a ka kgona go fodiša atheraithisi yela le go go dira o loke? Bjale, nno tšwelapele o sepela le go Moldeboga. Yeo ke nnete, bjale. O a bona? Ge o ka no dumela! Go lokile, mohlomphegi.

<sup>174</sup> A o ka tla, mohumagadi, feela ge o be o dutše fao, hle. A o ka tla? A o dumela ka pelo ya gago yohle? [Kgaetšedi o re, “Nka kgona bjang go e belaela?”—Mor.] Bjale yeo ke tsela, gona o ka se be le atheraithisi. O ka se golofale ka yona. E no ya pele tseleng ya gago, gomme o hlalale. Bothata bjoo bja sehumagadi bo a ema, le bjona. E no sepela, o leboga Morena, o re—o re, “Tumišo e be go Modimo!” Go lokile. Go lokile.

<sup>175</sup> Bjale o a dumela o dutšego fale, mohumagadi, a o a dumela? Go lokile, mohlomphegi. Bjale bothata bjoo bja sehumagadi o bilego nabjo, bothata bja sesadi, botelele; e no dumela ka pelo ya gago yohle, gomme sepela gomme e tla ba . . . o tla ba gabotse, gomme o ka se sa ba le bjona gape, ge o ka e dumela. O swanetše go e dumela.

<sup>176</sup> Go lokile, tliša mohumagadi, mosetsana yo monnyane. Etla mo, hani. Bjale, kgaetšedi, mo, ke tla tšea seatla sa gagwe, motsotso feela. Etla mo, moratiwa. Ke naganne seo ke se e bego e le sona. O hwetša go kgangwa nako ye nngwe, a ga o, ga o kgone go hwetša mohemo wa gago, le gatee? Asma yela ya kgale ke ye mpe gampe, eupša Modimo a ka kgona go e fodiša. A ga o dumele seo?

Morena Jesu, ke a rapela gore O tla fodiša ngwana . . . ? . . .

<sup>177</sup> O se belaele, kgaetšedi. E tla mo tlogela. Sepela gomme o dumele bjale, ka pelo ya gago yohle.

<sup>178</sup> Modimo o fodiša bolwetši bja swikiri. A ka kgona go dira eng kapa eng gabotse A nyakago. A ga o dumele seo? [Kgaetšedi o re, “Āmene.”—Mor.] A o a dumela O tla go fodiša? [“Amene.”] Go lokile, e re, “Ke a Go leboga, Morena,” gomme eya pele thwi, o no hlalala.

<sup>179</sup> Motsotso feela. Ke tšwelapele ke bona monna a etla godimo mo, ke a bona. Še yona. Moisa yo monnyane a dutšego fale, a swerego mošemane yo monnyane ka matsogong a gagwe. A o a dumela, mohlomphegi? Ke mosetsebje go wena. A o a dumela gore Modimo a ka kgona go utolla go nna se o se nyakago? O a bona, o Mo kgwathile. Ga ke go tsebe. Eupša o tlaišega ka bothata, bolwetši bja lerapo. Yeo ke nnete. Mošemane wa gago yo monnyane fale o nabjo. Mošemane wa gago yo monnyane a dutšego hleng le yena o nabjo. Yoo ke mosetsana wa gago yo monnyane a dutšego kgaušwi le yola. Yena, go ka matsogong a gagwe, gomme o mahlo a go leana. Ge seo e le therešo, emišetša seatla sa gago godimo. Bjale a o a dumela? O se ke wa kamaka. Eba le tumelo ka go Modimo. Feela se belaele. E no dumela. Dilo tšohle di a kgonega go bona ba dumelago.

<sup>180</sup> O llela eng, mohumagadi yo monnyane, a dutšego fale, godimo bofelong, le sakatuku sa gago godimo ga sefahlego sa gago, o a lla? A o ntumela go ba mohlanka wa Gagwe? A o a dumela Modimo a ka nkutollela seo bothata bja gago e lego, go

tloga fa? O na le bothata bja semoya o ithutago ka bjona. A yeo ke nnete? Yohle e ya go apoga. E tla loka.

<sup>181</sup> Mohumagadi yola a dutšego kgauswi le wena fale, o sa tšo bolela le yena motsotso. O sa tšo bea sakatuku sa gagwe godimo ga sefahlego sa gagwe. O a dumela Modimo a ka mpotša bothata bja gago ke eng, kgaetšedi? A o tla ntumela, bjalo ka moprofeta wa Gagwe, mohlanka wa Gagwe? O tla dira? Go lokile. Bothata bjola bja disaenase bjoo bo bego bo go tshwenya, bo tla tloga go wena ge o ka e dumela. A o tla e dumela? Ge o ka dira, phagamišetša seatla sa gago godimo, o re, "Ke a e dumela."

<sup>182</sup> O nyaka go ja selalelo sa gago, go tšwa go bothata bjola bja mogodu, kgauswi le mo, mohumagadi. O dumela ka pelo ya gago yohle, le wena?

<sup>183</sup> Mohumagadi yo a latelago o na le bothata bja semoya fao. Gomme o na le sebab, le wena, seo se go tshwenyago. O na le morwedi yo a nago le sebab, le yena. A yeo ga se therešo? Ee, mohlomphegi. O dutše ka gare. A o dumela seo? Go lokile, o ka fodišwa ge o e dumela.

<sup>184</sup> Go reng ka godimo ka tsela *ye*? Mo, go bona yo monnyane yo, monna wa Momexican a dutšego fase mo ka mafelelong, a lebeletše thwi go nna? A ga le bone Seetša sela se lekeletše godimo ga gagwe? Monna ke leswiswi ka godimo ga seo, le a bona, se se lego fale go mo dikologa, ke go hwa dihwahwa. A o a dumela gore Modimo a ka kgona go go fodiša go hwa dihwahwa, mohlomphegi? O a dira? Go lokile, O tla e dira.

<sup>185</sup> E re, monna yo monnyane kgauswi le wena fao, yo monnyane, monna wa Mospain, o na le go phatloga. A o a dumela gore Modimo a ka kgona go fodiša go phatloga ga gago, mohlomphegi? A o dumela seo ka pelo ya gago yohle? O a dira?

<sup>186</sup> Wa go latela, o na le bothata bja mogodu. Wena yo o kgothulakgothulago hlogo ya gago fao, o na le bothata bja mogodu. A o a dumela Modimo o go fodišitše? Gona sepela o je selalelo sa gago, O tla e dira.

<sup>187</sup> Mpotšeng se ba se kgwathago, tsela yohle go kgabaganya batheeletši. Ke eng? Ke ponagatšo ya Lentšu la Modimo. A le a e dumela, lenabeng? A le a e dumela?

<sup>188</sup> Ba bangwe ba bona ba kae mo? Mo, monna šo o robetše ka khote. Mohlomphegi, ga ke go tsebe. Ga se ka ke ka go bona. A o a ntumela? A o dumela se o se kwelego ke Therešo? A o e dumela ka pelo ya gago yohle? Ge—ge Modimo a ka mpotša fa se e lego phošo ka wena, a o tla—a o tla... a o tla e dumela? Ke ya go go botša se sengwe bjale. Gomme o a se tseba, o dutšego hleng le yena. O apešitše ke moriti go iša lehung. Ke kankere. Ke kankere. Gomme o modiredi wa Ebangedi. Ke go bona o eme ka phuluphithing. Gomme yeo ke nnete. Gomme o tšwa ka ntle ga toropo. Bjale o dumela ka pelo ya gago yohle. O dumela ka

pelo ya gago yohle. Gobaneng o robetše kua go fihla o ehwa? O a bona? O ka se kgone go lahlegelwa.

<sup>189</sup> Go be go le balephera ba bangwe. Le elelwa kanegelo, ge Samaria e hlaselwa, bona balephera ba tla ka kua? Ba rile, “Gobaneng re ka dula fa go fihla re ehwa? Ge re ka dula fa, re a hwa; ge re eya ka toropongkgolo, re a hwa.”

<sup>190</sup> Ngaka o dirile tšohle a kgonago go di dira. Ga go selo se ka dirwago, ke karabo ya gagwe ka go seo. O na le feelsa sebaka se tee. Bona balephera ba kilego ba ba le sebaka, ge ba ile tlase ntlong ya lenaba; ge ba ba phološitše, ba phetše; ge ba se ba dira, ba be ba eya go hwa, go le bjalo. Eupša ga o kgopelwe go ntlo ya lenaba. O ka Bogeneng bja Modimo wa gago. O letetše go... Gobaneng o sa emelele, gomme o tsee khote yela gomme o ye gae, Leineng la Jesu Kriste. Gomme o e dumele, gomme o ye gae gomme o dumele gore o fodile.

<sup>191</sup> A ka moka ga lena le tla dumela selo sa go swana? Ge le dira, emeolang ka maoto a lena.

<sup>192</sup> Ke kgopela batho bale ba phagamišitše diatla tša bona, ge ba nyakile go phološwa, gomme ba nyakile go amogela Jesu Kriste, Ke nyaka le tle godimo fa le go ema fa hleng le nna, feelsa motsotso. A le ka tla bjale? Etlang godimo fa, lena bao le dumetšego le go nyaka go amogela Kriste. O ka se tsoge wa ba bokgauswana bjo bo itšego go Yena go fihla o kopana le Yena a bonala. Elelwang, Lentšu, gomme ke rerile, Modimo o Le tiišeditše go ba Therešo. Etlang pele, etlang godimo ka tsela *ye*, yo mongwe le yo mongwe wa lena. Yo mongwe le yo mongwe a bego a sa tsebe Kriste, yo a phagamišitše diatla tša gago, le go tla mo; le re le be le le badiradibe, gomme le be le nyaka go phološwa, etlang mo gomme le eme motsotso, bakeng sa thapelo. A le tla e dira? A le tla tla ge A sa le kgauswi kudu?

<sup>193</sup> Le ra gore le ka kgora go bona mo Lentšu le rerwa, go bona Modimo a retologa go dikologa gomme a bolela gore Lentšu ke Therešo, “Yoo ke Nna, yoo ke Nna, Ke eme fa, yena Modimo yoo a yago go go ahlola,” gomme morago wa swara morago? O se e dire, o ka no ithipa wenamong go ya go ile. Le a bona? Šeba ba bararo ba bona ba eme fa. Go na le e ka ba tasene tše pedi. Etlang thwi bjale, a le tla?

<sup>194</sup> Aowa, ga go pina, ga wa swanelo go ba le pina. Kriste ke pina ya lena. Kriste ke phenyego ya lena. Lentšu ke lona le e bolelago.

<sup>195</sup> Yeo ke nnete, fa go tla lesogana ba babedi. Etlang thwi pele ntle, lena bao le lego badiradibe. Etlang thwi tlase fa feelsa nakwana, a le tla? Thwi ge ke sa no ikwela go hlahlwa, ke emišitše mothalo wola wa thapelo bakeng sa morero wo. Etlang thwi fa bjale. Etla thwi fa. Re tla tla go mothalo wa thapelo. Feela... Yeo ke nnete. Ya, bahumagadi etlang thwi pele ka *mo*, dilo tše mpsha.

<sup>196</sup> Thwi ka go letšatši le ge magagešo a baswa ba etla, ka go iri ye kgolo ye ge go sa le baswa mo lešumathong la

maitshwarohlephi, batho ba ba tla go . . . Gomme ke a tshepa gore Modimo o tla ba dira mehlala ye bjalo go fihla, boagišani, moo batho ba tla bonago gore Jesu Kriste o sa phološa balahlegi.

<sup>197</sup> A o ka se tle? Etla thwi ntle, moo o lego. Sepelela tlase fa, feela nakwana. Yeo ke nnene. Modimo a le šegofatše, bašemane. Seo ke se sebotse. Etlang thwi godimo gomme le eme. Etlang, etlang. Moragorago ka morago, batho ba bangwe moragorago le phagamišeditše diatla tša lena godimo, a le ka se tle pele fase bjale?

<sup>198</sup> Ke nyakile go le phegelela. Ke nna . . . [Ngwanešu Branham o kokota godimo ga phuluphithi—Mor.] Lentšu le eme ka ntle, le a kokota, le leka go tsena ka gare. “Bonang, Ke eme mojako, gomme ke a kokota; ge motho e ka ba mang a ka bula le go tsena, a Ntumelela go tsene, Ke tla lalela le yena, gomme yena le Nna.” A o ka se tle? Etla thwi fase bjale, ema mo. Lebelelang, Lentšu le rerilwe, Le netefaditše, Kriste o tsogile go tšwa bahung, šo O dira feelsa se A rilego O tla se dira. E sego go kgomagana le mekgatlo, dikerekemaina, go go tšeela ka go se sengwe; yeo ke kgetho ya gago. Ke nyaka o tše Kriste bjale.

<sup>199</sup> Etla, a o ka se ke? A go na le yo mongwe? A . . . Modimo a go šegofatše. Yeo ke nnene, mo tliše thwi godimo fa.

<sup>200</sup> Baena, a le ka sepela tlase fa? Bjale ba e tla ba maloko a dikereke tša lena. Etlang tlase fa.

<sup>201</sup> Etla pele, yo mongwe gape. Thwi ka Bogoneng bja Kriste, ke kgona go no kwa Moya o no bitša ka pelong ya ka. Ka kgonthé, ge woo o dira seo ka pelong ya ka, go na le yo mongwe ntle fale a swanetšeego go be a etla. A go na le mokgelogi ntle kua yo a swanetšeego go tla? Etla, ema mo. A o ka e dira, ba bangwe ba lena? Mokgelogi, a o ka tla? Yeo ke nnene. Modimo a go šegofatše. Etla pele. Yeo ke yona, etla thwi pele go theoga. Nnene. Yeo ke tsela. E ba monna wa kgonthé; mohumagadi wa kgonthé. Modimo o go dirile, mohumagadi. Modimo o go dirile, monna. Bjoo ke bokwala. Ao ke maatla. Etla bjale, a o ka se ke? Etla, ema tikologong fa. Yeo ke nnene. Yeo ke nnene. Modimo o go nyaka ka Bogoneng bjo Bokgethwa bja Gagwe. Elelwa, bjona . . .

<sup>202</sup> Modimo o ya go ahlola lefase ka mang? Jesu Kriste. Ke mang a tshepišitšeego go dira se mo matšatšing a mafelelo, go ikutolla Yenamong? Jesu Kriste. Ga se nna. Ke Kriste. Kriste ke Yena yoo a lego fa a ikutollago Yenamong. Boikokobetšo, boka A bile; go tšweleng ntle ga selo, boka A dirile; go tleng ka go rena, boka A dirile. Yena ke Modimo.

<sup>203</sup> Bjale yo mongwe le yo mongwe wa lena badiredi kgobokanang thwi tlase go dikologa batho ba, thwi ka pela bjale eyang thwi tlase magareng ga bona fa, emang thwi go ba dikologa. Re ya go ba rapelela.

<sup>204</sup> Yo mongwe gape o nyaka go tla ka thapelong ye? Nakwana feelsa. Go lokile.

<sup>205</sup> Ba e tla ba maloko a dikereke tša lena, bagwera. Ba e tla ba . . . Lena, le tla swanelo go ba tšeа go tloga mo go ya pele, bjale. Ba bona Morena Jesu ka maatleng a Gagwe a tsogo ya Gagwe. Ba mo go ba maloko a kereke ya gago. O ba kolobetša ka kolobetšo ya Bokriste, o ba tšeela ka kopanelong ya gago. Ke ba gago bjale, go tloga fa go ya pele. Ke wena mohlokomedi wa lefelo la baeti.

<sup>206</sup> A re inamišeng dihlogo tša rena, yo mongwe le yo mongwe. Yo mongwe le yo mongwe, Mokriste ntle kua, yo a hlokofetšego, neela thapelo bakeng sa batho ba.

<sup>207</sup> Gomme ge badiredi ba ba nyaka go ba tšeela ka kamoreng, moo ba ka go rutwa pejana, go lokile.

<sup>208</sup> Tate wa Legodimong, se ke dipolo tša kopano. Mo go tla badiradibe, lesometlhano goba masomepedi a bona ba kgobokane go dikologa aletara, ba nyaka go neela dipelo tša bona go Wena. Ke a rapela, Tate, gore o tla ba amogela, Leineng la Kriste Jesu Morena. Ke a rapela gore O tla ba amogela, wa ba fa Bophelo bjo Bosafelego. Ke bohwa bja Gago, Morena.

<sup>209</sup> Motho yo mongwe le yo mongwe ka fa, yoo a babjago bjale, beang diatla tša lena go lena seng. Obeletsang godimo, beang diatla tša lena, gomme le thome go rapela, yo motee go yo mongwe. Beanang diatla seng sa lena, thomang go rapela, seng sa lena.

<sup>210</sup> Badiredi, beang diatla tša lena godimo ga batho ba fa. Yeo ke yona. Go na le maatla le letago le ditšhegofatšo godimo ga rena, gomme Sathane o fentšwe ka Bogoneng bja Kriste.



*GE MAHLO A BONA A BULEGILE, BA MO TSEBILE* NST64-0212  
(When Their Eyes Were Opened, They Knew Him)

Molaetša wo ka Ngwanešu William Marrion Branham, setlogong o abilwe ka Seisimane ka Laboraro mantšiboa, Febereware 12, 1964, ka Elliott Auditorium ka Tulare, California, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye ya North Sotho phetolelo e ngwadilwe gomme ya phatlalatšwa ke Voice Of God Recordings.

NORTH SOTHO

©2023 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriſte. Puku ye e ka se kgone go rekišwa, go tſweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditſhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)